

**ASO LUA, 20 MATI 2018**

*Na tauaofia le Fono Aoaofa Faitulafono i le itula e 9:00 i le taeao e tusa ai ma le Polokalame o Fonotaga a le Palemene 2018.*

*Na nofoia le Nofoa e le Fofoga Fetalai i le itula e 9:00 i le taeao.*

Tatalo.

**FOFOGA FETALAI:** Ou te faasilasila atu ua amatalia nei Galuega ma Taulumaga a le Fono Aoaofa Faitulafono.

**MALELEGA MAI LE AO O LE MALO**

*Na fofogaina e le Fofoga Fetalai Malelega mai Lana Afioga Mamalu, O Le Ao o le Malo.*

**1. “TUSI mo:**

**Le Fofoga Fetalai:**

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le maliega i le Fono Aoaofa Faitulafono na te iloiloaina ai le Tulafono Tau Faaofi ua faaalua iinei:

1. Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2018.

**TUUIINA ATU** i lou nei Lima i lenei aso 16 o Mati 2018.

**(Sainia): Tuimalealiifano Vaaletoa Sualauvi II**  
**OLE AO O LE MALO.**

20 MATI 2018

**Malelega Mai Le Ao o le Malo**

**2. TUSI mo:**

**Le Fofoga Fetalai:**

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le maliEGA i le Fono AoaO Faitulafono na te iloiloina ai le Tulafono Tau Faaofi ua faaalua i inei:

1. Tulafono Tau Faaofi o le Ofisa o Taaloga a le Pasefika 2018.

**TUUNA ATU** i lou nei Lima i lenei aso 19 o Mati 2018.

**(Sainia): Tuimalealiifano Vaaletoa Sualauvi II**  
**O LE AO O LE MALO**.

**FAASILASILAGA MAI LE TAITAI O LE MAOTA**

*Na fofogaina e le Fofoga Fetalai Faasilasilaga mai le Taitai o le Maota.*

E tusa ai ma le Tulafono Tumau 76 a le Palemene ua tuuina atu nei le Faaaliga i le Fono AoaO Faitulafono mo le iloiloina o Tulafono Tau Faaofi ua faaalua i inei:

1. Tulafono Tau Faaofi o Teuteuga o le Tulafono o Puipuiga mai Aafiaga o le Tapaa 2018.
2. Tulafono Tau Faaofi o le Komisi o Faiga Palota 2018.
3. Tulafono Tau Faaofi o Faiga Palota 2018.
4. Tulafono Tau Faaofi o Itumalo Palota 2018.

**TUUNA ATU** i lenei aso 16 o Mati i le tausaga 2018.

**(Sainia): Susuga Hon Tuilaepa Auelua Fatialofa Lupesoliai Lolofietele**  
**Neioti Aiono Galumalemana Dr. Sailele Malielegaoi**  
**TAITAI O LE MAOTA.**

20 MATI 2018

**Faasilasilaga Mai le Taitai o le Maota**

E tusa ai ma le Tulafono Tumau 76 a le Palemene ua tuuina atu nei le Faaaliga i le Fono Aoaofa Faitulafono mo le iloiloaina o le Tulafono Tau Faaofi ua faaaliga i nei:

1. Tulafono Tau Faaofi o Teuteuga o le Faavae (Nu.2) 2018.

**TUUIINA ATU** i lenei Aso Gafua, 19 o Mati i le tausaga 2018.

**(Sainia): Susuga Hon Tuilaepa Auelua Fatialofa Lupesoliai Lolofietele  
Neioti Aiono Galumalemana Dr. Sailele Malielegaoi  
TAITAI O LE MAOTA.**

E tusa ai ma le Tulafono Tumau 100(2), ua tuuina atu nei le Faaaliga i le Fono Aoaofa Faitulafono mo le iloiloaina o le Tulafono Tau Faaofi ua taua i lalo i lona Tulaga Faanatinati.

1. Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2018.

**TUUIINA ATU** i lenei aso 16 o Mati i le tausaga 2018.

**(Sainia): Susuga Hon Tuilaepa Auelua Fatialofa Lupesoliai Lolofietele  
Neioti Aiono Galumalemana Dr. Sailele Malielegaoi  
TAITAI O LE MAOTA.**

E tusa ai ma le Tulafono Tumau 100(2), ua tuuina atu nei le Faaaliga i le Fono Aoaofa Faitulafono mo le iloiloaina o le Tulafono Tau Faaofi ua taua i lalo i lona Tulaga Faanatinati.

1. Tulafono Tau Faaofi o le Ofisa o Taaloga o le Pasefika 2018.

**TUUIINA ATU** i lenei aso 19 o Mati i le tausaga 2018.

**(Sainia): Susuga Hon Tuilaepa Auelua Fatialofa Lupesoliai Lolofietele  
Neioti Aiono Galumalemana Dr. Sailele Malielegaoi  
TAITAI O LE MAOTA.**

20 MATI 2018

### SAUNOAGA FAAFEILOAI A LE FOFOGA FETALAI

**FOFOGA FETALAI:** E avea lenei avanoa ou te faatalofa atu ai i le paia o le Palemene aemaise o lau Afioga i le Palemia ma lau Afioga i le Sui Palemia ma le mamalu o le Kapeneta, e faapea foi le maualuga o sui usufono filifilia o lupe na faia mai le fuifui o Taitai o le atunuu ma le atunuu, ina ia mafai ona faatino le tatou galuega i lenei taeao i Lona alofa, ana le seanoa le alofa o le Atua e tatou te le maua le nofo filemu, aua o lupe lava sa vaoseese i lo outou soifua ma lo tatou ola galulue, ua tatou fuifui faatasi i lenei taeao, ona o le tausiga a le Matai sili i le lagi.

Ia faamanuia le Atua i le alofaiva aua le tatou Fono.

### ISI FAASILASILAGA A LE FOFOGA FETALAI

**FOFOGA FETALAI:** Mo le silafia e le Maota, ua nofoia nei le Nofoga mo Tagata Lautele e alo ma fanau aoga o le Vasega 8 a le Aoga Tulagalua a Vaitele-uta, o se vaega faaauau o Polokalame Faa-Palemene mo Aoga Tulagalua. Ua i ai le faamoemoe mo le lumanai, i le auai mai o aoga taitoatasi tulalata mai i le Palemene, mo lea faamoemoe taua o le Palemene. O lea ua amatamea le Aoga Tulagalua a Vaitele-uta e mataitu ai le faaleleia o a tatou polokalame mo aoga tulagalua.

E fai ai lou leo ma sui o le Palemene, e faafeiloai ma faatalofa atu ai i susuga i faiaoga aemaise o alo ma fanau. Ia faamanuia le Atua i taualumaga o la outou polokalame i lenei aso.

### TUUIINA ATU O PEPA

*Na tolaulau e le Failautusi Pepa nei ua faataatia i luga o le Laulau a Fono e tusa ai ma le T.T.49.*

1. S.R. 2018/1. Tulafono Faatonutonu a Kamupani Tausi Mavaega (Totogifuapauina ma Pepa Faatupu) 2017.
2. S.R. 2018/2, Tulafono Faatonutonu o Faaputuga Oa Faavae Resitalaina (Totogifuapauina ma Pepa Faatupu) 2017.
3. S.R. 2018/3, Tulafono o le Fafoega o Taaloga Eeseese Tau Tupe 2017 ó Faasilasilaga o le Amata Faamamaluina.
4. P.P. 2017/2018 Nu.150, Lipoti Faaletausaga a le Kamupani Vaalele a le Polenisia 2017.
5. P.P. 2017/2018 Nu.151, Lipoti Faaletausaga a le Faalapotopotoga o Mea Tau Fale a Samoa 2017.
6. P.P. 2017/2018 Nu.152, Lipoti Faaletausaga a le Pulega o le Suavai a Samoa 2016/2017.
7. P.P. 2017/2018 Nu.153, Lipoti Faaletausaga a le Matagaluega o Leoleo 2015/2016.
8. P.P. 2017/2018 Nu.154, Lipoti Faaletausaga a le Falemeli o Samoa 2017.

20 MATI 2018

**Tuina atu o Pepa**

9. P.P. 2017/2018 Nu.155, Lipoti Faaletausaga a le Matagaluega o Faamasinoga ma Pulega Tau Faamasinoga 2015/2016.
10. P.P. 2017/2018 Nu.156, Lipoti Faaletausaga a le Ofisa o le Komisi o Galuega a le Malo 2015-2016.
11. P.P. 2017/2018 Nu.157, Lipoti Faaletausaga a le Matagaluega o Tupe 2015-2016.
12. P.P. 2017/2018 Nu.158, Lipoti Faaletausaga a le Komisi o le Toefuataiga o Tulafono a Samoa Iulai 2016-Iuni 2017.

**TUINA ATU O LIPOTI A KOMITI FAA-PALEMENE**

*Na tolaulau e le Failautusi Lipoti a Komiti Faa-Palemene nei ua faataatia i luga o le Laulau a fono e tusa ai ma le T.T.51(5).*

1. P.P. 2017/2018 Nu.160, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le Tulafono Tau Faaofi o Teuteuga o le Tulafono o Tulaga Mamalu ma Faailoga Taualoa 2017;
2. P.P. 2017/2018 Nu.161, Lipoti a le Komiti o Tupe Maua ma Tupe Totogi i le Tulafono Tau Faaofi o Teuteuga o le Tulafono o le Faafoega o Kasino ma Taaloga Eseeese Tau Tupe (Nu.2) 2017.
3. P.P. 2017/2018 Nu.162, Lipoti a le Komiti o Tupe Maua ma Tupe Totogi i le P.P. 2017/2018 Nu.58, Lipoti Faaletausaga a le Iunivesite Aoao o Samoa mo le Tausaga Faaletupe 2015/2016;
4. P.P. 2017/2018 Nu.163, Lipoti a le Komiti o Tupe Maua ma Tupe Totogi i le P.P. 2017/2018 Nu.64, Lipoti Faaletausaga a le Ofisa o le Pule Faatonu mo le Tausaga Faaletupe 2015/2016;
5. P.P. 2017/2018 Nu.164, Lipoti a le Komiti o Tupe Maua ma Tupe Totogi i le P.P. 2017/2018 Nu.114, Lipoti Faaletausaga a le Faalapotopotoga Faavae Tau Fatugao a Samoa mo le Tausaga Faaletupe 2016/2017;
6. P.P. 2017/2018 Nu.165, Lipoti a le Komiti o Tupe Maua ma Tupe Totogi i le P.P. 2017/2018 Nu.117, Lipoti Faaletausaga a le Pulega o Tupe Faavaomalo mo le Tausaga Faaletupe 2016/2017;
7. P.P. 2017/2018 Nu.166, Lipoti a le Komiti o Tupe Maua ma Tupe Totogi i le P.P. 2017/2018 Nu.118, Lipoti Faaletausaga a le Faaletupe o Atiina-Ae o Samoa mo le Tausaga Faaletupe 2016/2017;
8. P.P. 2017/2018 Nu.167, Lipoti a le Komiti o Tupe Maua ma Tupe Totogi i le P.P. 2017/2018 Nu.120, Lipoti Faaletausaga a le Faaputugatupe mo le Lumanai Manuia o Tagata Samoa mo le Tausaga Faaletupe 2016/2017;
9. P.P. 2017/2018 Nu.168, Lipoti a le Komiti o Tupe Maua ma Tupe Totogi i le P.P. 2017/2018 Nu.121, Lipoti Faaletausaga a le Faalapotopotoga o Suesuega Faasaienisi o Samoa mo le Tausaga Faaletupe 2015/2016;

**Tuuina atu o Lipoti a Komiti Faa-Palemene**

10. P.P. 2017/2018 Nu.169, Lipoti a le Komiti o Tupe Maua ma Tupe Totogi i le P.P.2017/2018 Nu.123, Lipoti o Galuega ma Tala o le Tupe a le Faaputugatupe o Faamanuiaga mo Tagatanuu Matutua o Samoa mo le Tausaga Faaletupe 2016/2017.
11. P.P. 2017/2018 Nu.170, Lipoti a le Komiti o Tupe Maua ma Tupe Totogi i le P.P. 2017/2018 Nu.148 ma le P.P. 2017/2018 Nu.149, Lipoti Faaletausaga a le Auaunaga Faasoifua Maloloina mo Tausaga Faaletupe 2014/2015 ma le 2015/2016.
12. P.P. 2017/2018 Nu.171, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P. 2017/2018 Nu.119, Lipoti Faaletausaga a le Penisione mo le Palemene mo le Tausaga Faaletupe 2016/2017.
13. P.P. 2017/2018 Nu.172, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P. 2017/2018 Nu.116, Lipoti Faaletausaga a le Ofisa Tausi Mavaega mo le Tausaga Faaletupe na faaiuina aso 30 Iuni 2016.
14. P.P. 2017/2018 Nu.173, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P. 2017/2018 Nu.144, Lipoti Faaletausaga a le Matagaluega a le Palemia ma le Kapeneta mo le Tausaga Faaletupe na faaiuina aso 30 Iuni 2017.
15. P.P. 2017/2018 Nu.174, Lipoti a le Komiti o le Vaega o Atiina Eseese i le P.P. 2017/2018 Nu.70, Lipoti Faaletausaga a le Matagaluega o Fesootaiga ma Faamatalaga Tekonolosi mo Tausaga Faaletupe 2011-2016.
16. P.P. 2017/2018 Nu.175, Lipoti a le Komiti o le Vaega o Atiina Eseese i le P.P. 2017/2018 Nu.68, Lipoti Faaletausaga a le Pulega o Uafu ma Taulaga mo le Tausaga Faaletupe e faaiuina aso 30 Iuni 2016.
17. P.P. 2017/2018 Nu.176, Lipoti a le Komiti o le Vaega o Atiina Eseese i le P.P. 2017/2018 Nu.122, Lipoti Faaletausaga a le Pulega o Malae Vaalele a Samoa mo le Tausaga Faaletupe na faaiuina aso 30 Iuni 2017.
18. P.P. 2017/2018 Nu.177, Lipoti a le Komiti o le Vaega Tau Le Tamaoaiga i le P.P. 2017/2018 Nu.124, Lipoti Faaletausaga a le Matagaluega o Pisinisi, Alamanuia ma Leipa mo le Tausaga Faaletupe na faaiuina aso 30 Iuni 2017.
19. P.P. 2017/2018 Nu.178, Lipoti a le Komiti o le Vaega Tau Le Va Fealoai i le S.R. 2017/9, Tulafono Faatonutonu o Taumafa (Saogalemu ma le Tulaga Aupito Manaomia) 2017.
20. P.P. 2017/2018 Nu.179, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P. 2017/2018 Nu.59, Lipoti o le Tulaga o Aia Tatau a Tagata Soifua 2017 a le Ofisa o le Komesina o Sulufaiga.

20 MATI 2018

**LAFO A TAITAIFONO A KOMITI FAA-PALEMENE E TUSA AI MA TULAFONO TUMAU 45**

**FOFOGA FETALAI:** Ou te tapa lau Afioga i le Taitaifono o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae.

**Afioga Hon AEAU PENIAMINA LEAVAISEETA (Taitaifono Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae):** Lau Afioga i le Fofoga Fetalai ou te faatu le lafo, *Ina ia tuuina mai e le Fono Aoao se Faatagaga e faaopoopo ai le taimi e iloiloina ai le P.P. 2017/2018 Nu.100, Lipoti a le Komisi o le Toefuataiga o Tulafono a Samoa i le Pule a le Matai Sa'o (Lipoti Faaiu 18/17), Fepuari 2017, na tuuina mai i lenei Komiti, ona e le i maea atotoa i ai ana iloiloga, ma lipoti mai ai i le Fono Aoao i le Fonotaga e sosoo ai.*

*Faaluaina e le sui usufono mo Palauli le Falefa ma le sui usufono mo Anoamaa Sisifo.*

*Na faamaonia le lafo.*

**FOFOGA FETALAI:** Ou te tapa lau Afioga i le Taitaifono o le Komiti o le Vaega o Atiinae Eeseese.

**Afioga TAFUA MALUELUE TAFUA (Taitaifono Komiti Vaega o Atiinae Eeseese):** E muai faatalofa atu i lau Afioga i le Fofoga Fetalai, aemaise foi lea itu o le Maota le Afioga i le Taitai ma le Kapeneta, le Sui Palemia ia faapea foi Sui a Minisita, e faapea foi lea vaega o le Maota. E faatalofa atu foi i e o lo o afifio mai i Faauluuluga ma taitai o Matagaluega faapea foi Matagaluega Tumaoti a le Malo, ia faapea foi le Aoga a Vaitele-uta o lo o tatou faatasi ai le Aoga Tulagalua. O lenei taeao viia le alofa o le Alii ua uma ona e momoli lapapalaomalo lau Afioga i le Fofoga Fetalai.

Ae ou te tulai atu ma le faaaloalo, ou te faatu le lafo, *Ina ia tuuina mai e le Fono Aoao se Faatagaga e faaopoopo ai le taimi e iloiloina ai le P.P. 2017/2018 Nu.115, Lipoti Faaletausaga a le Faalapotopotoga o le Malosi Faa-Eletise mo le Tausaga Faaletupe 2015/2016, na tuuina mai i lenei Komiti, ona e le i maea atoatoa i ai ana iloiloga, ma lipoti mai ai i le Fono Aoao i le Fonotaga e sosoo ai.*

Ma le faaaloalo.

*Faaluaina e le sui usufono mo Palauli le Falefa, ma le sui usufono mo Anoamaa Sisifo.*

*Na faamaonia le lafo.*

20 MATI 2018

**TULAFONO TAU FAAOFI O TEUTEUGA O LE TULAFONO O FUA  
FAATATAU O LAFOGA O OLOA E GAOSIA I LE ATUNUU 2018  
– faitauga muamua**

**Afioga Hon TIALAVEA FEA LENIU TIONISIO HUNT (Minisita mo Tupe Maua):** E faatalofa atu i lau Afioga i le Fofoga Fetalai aemaise foi le paia o le Palemene, aemaise foi Faauluuluga o Matagaluega, aemaise alo ma fanau o tatou faatasi i lenei taeao.

Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2018 i lona faitauga muamua.*

*Faaluaina e le Minisita o Tupe ma le Minisita mo Tina ma Tamaitai, Atinae o Nuu, Afioga ma Agafesootai.*

*Na faamaonia le lafo ma faitauina le Tulafono Tau Faaofi i lona faitauga muamua.*

**TULAFONO TAU FAAOFI O TEUTEUGA O LE TULAFONO O  
PUIPUIGA MAI AAFIAGA O LE TAPAA 2018 – faitauga muamua**

**Afioga Hon TUITAMA TALALELEI TUITAMA (Minisita mo le Soifua Maloloina):** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Puipuiga mai Aafiaga o le Tapaa 2018 i lona faitauga muamua.*

*Faaluaina e le Minisita mo Pisinisi ma Alamanuia, Minisita mo Galuega, Felauaiga ma Atinae Eeseese, ma le Minisita mo Tagata Tafafao Maimoa mai Fafo.*

*Na faamaonia le lafo ma faitauina le Tulafono Tau Faaofi i lona faitauga muamua.*

**TULAFONO TAU FAAOFI O LE KOMISI O FAIGA PALOTA 2018  
– faitauga muamua**

**Afioga Hon FAAOLESA KATOPAU T. AINUU (Minisita mo Faamasinoga ma Pulega Tau Faamasinoga ma le Komisi o Faiga Palota):** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Komisi o Faiga Palota 2018 i lona faitauga muamua.*

*Faaluaina e le Minisita mo Aoga, Taaloga ma Aganuu ma le Minisita mo Fesootaiga ma Faamatalaga Tekonolosi.*

*Na faamaonia le lafo ma faitauina le Tulafono Tau Faaofi i lona faitauga muamua.*



20 MATI 2018

**TULAFONO TAU FAAOFI O FAIGA PALOTA 2018**  
– faitauga muamua

**Afioga Hon FAAOLESA KATOPAU T AINUU:** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Faiga Palota 2018 i lona faitauga muamua.*

*Faaluaina e le Minisita mo Aoga, Taaloga ma Aganuu ma le Minisita mo Fesootaiga ma Faamatalaga Tekonolosi.*

*Na faamaonia le lafo ma faitauina le Tulafono Tau Faaofi i lona faitauga muamua.*

**TULAFONO TAU FAAOFI O ITUMALO PALOTA 2018**  
– faitauga muamua

**Afioga Hon FAAOLESA KATOPAU T AINUU:** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Itumalo Palota 2018 i lona faitauga muamua.*

*Faaluaina e le Minisita o Tupe, Minisita mo Aoga, Taaloga ma Aganuu ma le Minisita mo Fesootaiga, Faamatalaga ma Fesootaiga Vavave Faaneionapo.*

*Na faamaonia le lafo ma faitauina le Tulafono Tau Faaofi i lona faitauga muamua.*

**TULAFONO TAU FAAOFI O LE OFISA O TAALOGA A LE PASEFIKA 2018 – faitauga muamua**

**Afioga Hon LOAU SOLA KENETI SIO (Minisita mo Aoga, Taaloga ma Aganuu.):** Ia logoitinomatagilelei i lenei taeo ina ua malele lau Afioga aua foi le tatou vatapuia ma lo tatou Matai le Silisiliese. Ae ua ou tulai atu ma le agaga faaaloalo tele, e faatu le lafo, *Ina ia faitauina nei le Tulafono Tau Faaofi o le Ofisa o Taaloga a le Pasefika 2018 i lona faitauga muamua.*

*Faaluaina e le Minisita mo Faamasinoga ma Pulega Tau Faamasinoga ma le Minisita mo Fesootaiga, Faamatalaga ma Fesootaiga Vavave Faaneionapo.*

*Na faamaonia le lafo ma faitauina le Tulafono Tau Faaofi i lona faitauga muamua.*

20 MATI 2018

**TULAFONO TAU FAAOFI O TEUTEUGA O LE TULAFONO O FUA  
FAATATAU O LAFOGA O OLOA E GAOSIA I LE ATUNUU 2018  
– faitauga faalua**

**FOFOGA FETALAI:** Talu ai ua taulimaina le Tusi Faamaonia o le Tulaga Faanatinati ua maea ona sainia e le Taitai o le Maota, o lea o le a sagai atu ai loa le Fono Aoa mo le faitauga faalua o le Tulafono Tau Faaofi.

Tapa ma le faaaloalo lau Afioga i le Minisita mo Tupe Maua e ana le Tulafono.

**Afioga Hon TIALAVEA FEA LENIU TIONISIO HUNT:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2018 i lona faitauga faalua, ma ou te fia tautala faamalamalama i ai.*

*Faaluaina e le Minisita mo Tina ma Tamaitai, Atinae o Nuu, Afioga ma Agafesootai, Minisita mo Faatoaga, Vaomatua ma Faigafaiva ma le Minisita o Tupe.*

**FOFOGA FETALAI:** Ou te tapa ma le faaaloalo lau Afioga e saunoa faamalamalama e tusa ai ma lau Tulafono.

**Afioga Hon TIALAVEA FEA LENIU TIONISIO HUNT:** Faafetai i lau Afioga i le Fofoga Fetalai, o le Tulafono lenei sa amata ona tapena mai i le 2016, ona oo mai lea i le Tala Faatatau o le Tupe i le tausaga ua mavae, na aumai ai lea i totonu o le Tala Faatatau o le Tupe le 3% o siitaga o le excise tax i totonu o oloa ia e suamalie e faia i le atunuu sa faatasi ai ma le ava malosi, te i la ua toe aveese le ava malosi ona ua i ai le faaiuga e faapea e faaopoopo le 100% ae se i aumai mulimuli le Tulafono lea.

O le faamatalaga lava ia e teuteu ai le Faamatalaga o le Tulafono Autu, i totonu o le Faamatalaga o lenei Tulafono i le Faasologa o Meataitasi i le Laina tasi (e pei ona faamatalaina i le Laina 2) e ala i le soloia o le Fua Faatatau o le Lafoga i totonu o le Laina 3 ma suia i le Fua Faatatau o le Lafoga o lo o i le Laina 4.

A tagai ifo le Maota i le Tulafono e 3% ia le siitaga na ua i ai i oloa uma lava e aafia ai ia mea suamalie. E aafia ai foi ma uaina ma so o se ituaiga oloa o lo o gaosia e lavea ai le suka ona o le tulaga foi mai le Ofisa o le Soifua Maloloina. O latou o lo o faagasoloa le puipuiga o le soifua maloloina o le atunuu. Ia e le tele se suiga o i ai na o le 3% lena e faaopoopo i ai i le tulaga o le excise tax i le taimi nei o le Tulafono tuai. A tagatagai la le Maota e pei o le faamatalaga ananafi, e le o tele se suiga e na o le 3%, a o le Tulafono foi lenei sa tataua ona amata i le aso 1 Ianuari o le tausaga lenei, ia e pei lava ona fai atu e le faigofie ona o le aafiaga foi o lafoga, aemaise le fofoga taumafa o le atunuu, ia ae o lea ua aumai i lenei taimi, ina ia mafai ai ona fesoasoani e tau faaitiitia ai o le faaogaina o le suka i mea suamalie ia ae taumafa foi lea e leai se suka i totonu o tou ti taumafa, ia vagana lava ia faguinu ma apainu o lo o ua le mafai ona alofia.

20 MATI 2018

**Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2018 – faitauga faalua**

Ia lena ua aafia i le 3% e faaopoopo i le excise tax, e tusa ai foi la ma oloa mai fafo, e faaopoopo foi le 3% i oloa mai fafo, a o oloa ia i totonu o le atunuu ia e faapena foi ona faaopoopo i ai le 3%.

Ia o le faamalamalama lena o le Tulafono lau Afioga i le Fofoga Fetalai.

**FOFOGA FETALAI:** Malo faafetai, ia atonu a. Se i tulai mai lau Afioga i le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegai (Palemia):** Lau Afioga i le Fofoga Fetalai, o le Tulafono sa faatulai atu nei, o le Tulafono lea e tali atu ai i le tulaga maoae lea agai uma i ai ia le Pasefika o se mataupu laualuga lea i le fonotaga a Taitai o le Malo o le Pasefika, Forum, ona ua maitauina o lo o maualuga le tulaga ua agai i ai le faatumutumuga o le soifua maloloina i le fonu a Minisita a le Soifua Maloloina a le Pasefika, ona o le toatele o tatou tagata o le Pasefika ua aafia i faamai ia ua faalupe e le gagana faaperetania, non communicable disease lea o lo o faasamoaina e tatou o mai oti, ona pe a ma le 8 ia faamai nei e o tutusa lelei ia ma mafuaaga lava ia e tasi lea ua afaina ai le toatele o le soifua o tagata o le Pasefika. E matua maoae lava foi le aafia ai o Samoa e aafia ai ia le toto maualuga, mai fatu, kanesa mea uma lava tatou te taumafaina, o mea suamalie taumafa mea lololo. O le tulaga la lena ua agai uma lava ia atunuu o le Pasefika i le itu lea ona o le tulaga tau taofiofi ia faamai nei ua taugata tele mo Malo, aemaise lava le tatou Malo, o le mea lea ua aafia ai lo tatou Malo e le itiiti ifo i le NZ\$10miliona tala Niu Sila le seleni i le tau togafiti ai le anoano o tagata i vaiaso uma, vaiaso uma, vaiaso uma. O le va i le sefulu i le luasefulu mai e avatu e pasia e le Kapeneta e totogi e le Malo. Na o Samoa lava lea e faia le mea lea, a o Tonga ma Fiti e na o le tai \$100,000 i le tausaga, e paluku lava e latou fomai, a alu atu lava ua oti ua oti. A o tatou, o lea e fai ma ave i fafo. O le ala foi lena o lea e taumafai ai ia le Malo i polokalame eseese e siitia ai le iloa o a tatou fomai, train a tatou fomai ina ia togafiti i inei, o lea foi ua uma ona sainia isi feagaiga ma le Malo o Initia ina ia fesoasoani mai i le tau togafitiga o mea ia o faamai ia e tutupu mai i mea nei o taumafa, ma o lea foi ua malosia le alu o polokalame a fanau laiti i totonu o aoga, lea e i ai le faaupuga foi lele o latou polokalame, Eat the Rainbow, tulouna lava ma le gagana e faaoga, o le Ai o le mea lea o le Nuanua. A o le uiga tonu, o ai e alu i luga e ai le nuanua? A o le uiga tonu, ia toaaga fanau e amata aoaoina a o laiti i le taumafa o meaai nei o fruits e lanu eseese ona e eseese foi ia le sao e maua e le malosia o le tino mai ituaiga o fualaau nei suamalie e eseese lanu o pau taifei o le mago, ese le lanu pe a pula, ese le lanu o le vi, ae eseese foi ma mea lelei e maua e le tino.

O le tulaga la lena o lea e taumafai ai ia Malo uma o le Pasefika, o tatou polokalame la e fai nei, o polokalame e tatou te lipoti atu ai i fonotaga nei a fomai ma fonotaga a taitai o malo, o lea ua tatou taumafai e fai foi le tatou pitolaau. E le o toe taugofie ia togafitiga nei.

20 MATI 2018

**Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2018 – faitauga faalua**

O le ala foi lena e taumafai ai lo tatou Malo, ina ia fausia falemai ma faalelei le tautua a fomai, o lea foi e i ai le isi project tele lava lea o le a matua siitia ai ia falemai i tua, ina ia talatala atu i ai ia le tele o gasegase e taofi ai i tua ia siitia maualuga o le tautua a falemai nei i tua, ia tuutiitia ai le tau omai i Apia, o lea ua feomia tele, ia ma siitia ai foi ma le tautua a fomai.

Lau Afioga i le Fofoga Fetalai, o faiga nei mo le agai i le lumanai, o lo o taumafai i ai lo tatou Malo i le agaga ina ia lagolagosua le Maota nei i polokalame tetele ia e faatino nei e lo tatou Malo lea e aofia ai foi ma le toe tuufaatasia o le auunaga faapitoa i le falemai ma le pulega aoao, ona o se faiga sa manatu e lelei ai le tatou auunaga faale-soifua maloloina, a o lea ua atagia nei, ua atili ai ona solo i tua le tautua. O le tulaga la lena o lea ua toe tuufaatasia ai ina ia agai i luga le tautua a le tatou soifua maloloina aua le atunuu. E fai nei mea, ona o le lagolago atu i le soifua maloloina o le tatou atunuu.

Lau Afioga i le Fofoga Fetalai, o le toe faaopoopo atu lena i le taua tele o le Tulafono lena ua i lumamea.

**FOFOGA FETALAI:** Malo faafetai. Ma e i ai le manatu o le Nofoa o lea ua manino au o fala i le faapupulaga a le Malo, a o lea ua tulai mai le sui usufono mo Anoamaa Sisifo e tusa ai o le mataupu e fia saunoa ma malele. Ou te tapa lau Afioga i le matua.

**Tofa Hon LAUOFO FONOTOE NUAFESILI PIERRE LAUOFO (Anoamaa Sisifo):** Faafetai i lau Afioga i le Fofoga Fetalai. Ia ou te manatu o lele ua maea foi ona e pai i paia o le atunuu, e afua mai i le Matasaua seia paia le atunuluga, o lo o i ai le ala i Upolu ma le ala i Savaii ma le vaeluaga o matagi, ma o le a taalolo e le toe i ai sau faamatalaga.

Faafetai foi mo le viiga ma le faafetai i le Atua, o lea ua tuanai atu foi matagi sa feagai ma tatou, o lea faafetai o lea e maua e leai se soifua o afaina. Viia ai la ma faafetai i le Alii ma le Silisiliese i Lona alofa ma Lona agalelei i lo tatou atunuu. O lena foi taeao, o lea foi ua e faafoi le viiga ua Ia momoli mai lo outou soifua faapea foi sou ola, aua foi le faaauauina o tatou galuega i le tautuaina o si o tatou atunuu.

Ae le i oo sau upu i le Tulafono Tau Faaofi lau Afioga i le Fofoga Fetalai, na ona fia oo atu foi sau upu puupuu e tusa ai foi ma le mataupu pei ona silafia e le atunuu sa faasalalauina ma agiga foi i le ea i le aso ananafi ma anapo. Ua maea foi ona saunoa se tasi o sui o le afioaga e faamalulu ma faamaualalo foi i le mamalu o le atunuu ua aafia i lena mataupu. Ae na o sau faaopoopo ona o au o le sui usufono o le itumalo e toe faamauina ai le matou agaga maualalo e faapena ona matou faapai malu atu ai, e asuvai malu ma momoli atu i fale, e tusa ai foi ma le faalavelave po o le mataupu foi na aliali mai i fanauiti, ona o lena lava mea o taaloga.

20 MATI 2018

**Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2018 – faitauga faalua**

O le mea lea ua manatu ai, ua maea ona fale le mataupu ma ua suigamalie, ua galulue vaavaalua foi le afioaga o tupu ma ee ma le ofisa o leoleo, aua le faatinoina o ala o le Tulafono. Ua logoina foi au e le pulenuu ua maea ona feiloai ma le Afioga i le Minisita o Pulenuu i le aso ananafi. Ia e manatu la ua iu lea mataupu.

O le aso, masalo o se taimi o le aso lea o le a feiloai sui o afioaga e fa o lo o aafia i lenei mataupu, ma o lea e faapea e feiloai i lo matou nuu, ia ona faatino foi lea o tulaga masani i le va o afioaga, ina ia malupuipua le agai i luma ma aua ne i toe tulai mai ni faiga vevesi faapea. E pei o le mafuaaga lea, ae o le a taalolo lea itu, aua ou te manatu ua uma foi ona saunoa le Afioga i le Palemia i lea mataupu, o le a ou le toe faaauau la i le tulaga lena, ae o le a ou see mai i le tatou Tulafono Tau Faaofi.

Faafetai i lau Afioga i le Minisita. O tulaga faapea o lea ua saunoa le Afioga i le Palemia e faamalamalama atili Tulafono aemaise lava tulaga tau soifua maloloina. Ma o le mafuaaga foi lena e lagolagoina ai e lou sui usufono le Tulafono Tau Faaofi. A o le fautuaga, se i toe silasila i ai i isi oloa ia pei o vaitaumafa lea foi sa afea i le saunoaga a le Palemia, o lea e tau e matou nei o le au koleni ma le au faamalositino mo mea o health drinks. O tulaga ia o lea e pei e faatauina oloa nei ma maketi i se tulaga foi lea e fesoasoani i le soifua maloloina, aemaise lava latou o lo o koleni ma faamalositino ma tulaga faapena. O le agaga ina ia lagolagosua foi i polokalame a le tatou Matagaluega o le Soifua Maloloina, lea e pei ona saunoa foi le Afioga i le Palemia, ina ia faaleleia ma tulaga faapena. Ona o lea ou te vaai atu i le lisi o tatou oloa ia o lo o aumai, o le aafia le excise tax, o lo o i ai ma vaiinu foi ia o flavour drinks, ia atonu e eseese ni ituaiga.

O le lua o fautuaga lau Afioga i le Minisita, se i toe silasila, o nei vaitau a vaavaai ma silasila foi i faleoloa, o lo o tele ma anoanoai mau oloa eseese ia ua faaulufale mai i le atunuu, e le gata i taumafa ia i meaai, ae faapea foi i vaiinu po o vaitaumafa, ua eseese mau ituaiga vaitaumafa ia e aumai. E i ai ia vai pei foi lea e faamalie ai le tagata ina ia taumafa, ae leai se aoga tele mo lona soifua maloloina. Ae o lo o i ai foi vaitaumafa o lo o faapena ona aoga i le tagata o lo o faamalositino ma le tagata o lo o galue foi lele o le tulaga o le taumafai e tausi le soifua maloloina ma le soifua lelei. O vaega ia pei e ala atu ai le fautuaga lau Afioga, ma le isi mea lau Afioga i le Minisita, pei e maitauina e lou sui usufono, o lisi nei o oloa ia e aumai, pei ni lisi ua leva. O le fautuaga pe toe tagai le Matagaluega e toe review le lisi lea ina ia taumafai e aofia uma ai mau ituaiga oloa eseese o lea ua faaulufale mai i le atunuu, i lalo o le Tulafono lenei oloa e aafia i le tatou lafoga lea, ia ma faamaoti mai ai, atonu o i ina foi o le a faamaoti mai ai ia ni oloa e le aafia i le lafoga lenei, pe afai e i ai ni oloa e le aafia i le lafoga, ona e fai sina lautetele o isi faaupuga ia e aumai, pei e le o manino tonu, po o fea oloa e aafia, ae po o fea oloa e le aafia i le tatou lafoga.

E pei o nai manatu na lau Afioga i le Minisita e fesoasoani atu i le tatou Tulafono Tau Faaofi, ae faamalo faafetai.

20 MATI 2018

**Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2018 – faitauga faalua**

**FOFOGA FETALAI:** Malo faafetai. Ia se i tulai mai lau Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai sa ou manatu e sema se laolao i se taimi o mulimuli ane ai ona ou pai lea i le faalavelave lea na tupu ananafi. Ae ua ou toe tulai atu ma le agaga faaaloalo, ona o lea ua saunoa le sui usufono mai i le itumalo e aafia ai ia afioaga e lua lea na tulai mai ai le faalavelave. E taua tele le mea lea na tupu ananafi, o le leoina o le filemu o Samoa. E toafitu leoleo na ave i le falemai ua manunua. Ma e o uiga faapea e faaoga ai loa laau malosi a leoleo mo le puipuiga o lo latou soifua, o lo o i lalo o le Tulafono le puipuiga o leoleo e faaoga laau malosi mo le puipuiga o lo latou soifua. A o lau faafetai, o le lava o le onosai o le Komesina ma latou na taofia ai, ae ua oo le faalavelave i le tulaga e faaoga ai loa laau malosi.

Lau Afioga i le Fofoga Fetalai, e aoga tele le alu atu i totonu o le Maota o upu nei. O mea ia na pa pa ananafi o le faaoga o laau malosi e nisi o le afioaga o Luatuanuu, o le mea e sili ona taua, o le l malii ai o se leoleo. O leoleo foi latou, o lo o i ai le paoa atoa i lalo o le Tulafono e faaoga ai mea ia mo le puipuia o latou soifua. O leoleo foi nei, masalo e tofua uma lava tatou ma sui o leoleo o lea e i ai i totonu o lo o aofia le atunuu atoa. E saili saili a i gafa o latou, o isi tamalii o Samoa o lea e i totonu o le Matagaluga o Leoleo, o alii o le Malu o le Malo, o auuuna e aofia uma ai lava tatou o itumalo uma o Samoa. Ma o lea o lo o tuu i ai le tiute lea o le puipuiga ma le leoina o le atunuu ina ia maua le filemu. A o uiga ia na faaalia ananafi pei ona lipoti mai ia te au, o le fusi o mata o taulelea ma agai e le gata ua agai i leoleo lea e o atu ina ia faatino le latou tiute, o le puipuia o le atunuu femalagaai, ua aafia, ua tauai ma taavale a le atunuu femalagaai. Ia se i vaai i le l mafaufau. O amio le fufuua ua faia, ae o la sa i ai ma isi matai o la e auai i le mea lea. E taofi atu e isi matai ae la e i ai ma isi matai. O le lipoti foi na aumai ia te au, e aofia ai ma le pulenuu.

Lau Afioga i le Fofoga Fetalai, e le mama i Taitai o Leoleo le mataupu leni, ma e le mama foi i le Malo. O lea ua faafofoga e tatou te matauina pea i tala ia e sau mai fafo, ua le malu ia leoleo. Ma o i, ua lilifa i ai tulafono ma faaiuga e matua sala i le sala maualuga latou e latou te faaoo le malii i so o se leoleo po o le oti. O le matua mea matautia o le mea lea i tulafono uma a atunuu uma o le lalolagi. O lea e tatou te vaai atu i le mea lea e tupu. Ua oo ina fetauai ai le Malo o Amerika, i le faaoga e leoleo o le latou malosi e faaoga ai laau malosi, leaga o le mea lea ua sosolo mai i totonu o Samoa. O la e tilotilo i mea o ata tifaga. Ona faapea ai lea o latou ia, e le afaina o la foi e fai i fafo. A o Samoa, lea e i ai lana tu ma lana agaifanua. O le tu ma agaifanua e taulamua ai matai. O le a le mea lea e tupu? Ia o lea ua aliali mai, ua matua leai lava ma se paoa o matai e taofia ai a latou fanau. E oo i faifeau na taumafai e taofiofi.

20 MATI 2018

**Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2018 – faitauga faalua**

O le mea la lea lau Afioga i le Fofoga Fetalai, o le mafuaaga lena na samania ai e le Afioga i le Minisita le Pulenuu. O fea e tutu ai? O mea ia sa tatau ona fofu ma e tava lava mea e tutupu lau Afioga i le Fofoga Fetalai, e le tatau i ai tatou o matai o nuu ona tuufau a tatou fanau. O mea ia e fai i fonu a matai. A uma ona fonu, ua maua ia iu o fonotaga, ona valaau lea o taulelea e aumai e ave i ai le upu, le upu aoao, le amio ua le pulea.

Lau Afioga i le Fofoga Fetalai o mea ia e fai uma e nuu, ae ou te ofo pe afai e le o faia e nuu ia. E oo foi i taaloga nei o lakapi, ia ou te le iloa pe aisea ona le i ai ni matai e latou te puipui i fanau ina ia aua ne i o e fai mea ia. O le mea la na tulai mai, na faapogai i le fasia o le tama Luatuanuu e nisi foi o le aumaimoa i Falefa. O lona uiga, o le mafuaaga lea ua osovale ai fanau ia, e tui atu i o e na o le tasi lava lau Afioga le mea e faatino ai le Tulafono e aumai i i le Tulafono i Leoleo, o latou na e fofu mataupu faapenei, ae le o le faaoga o le malosi, o le malosi soonafai. A faaoga loa le mea lea, ua lua mea sese, e le faapea a lua mea sese ona maua ai lea o se sao e tasi, ua atili ai ona sese ia ma agai atu ai loa i le mea lea o le afaina fua o le Malu o le Malo, o lona uiga ua afaina uma lava le atunuu atoa, o tamalii o afioaga o itumalo, o isi o fanau a tatou itumalo, lea e aafia uma lava le Maota lena, aemaise o le puipuiga o le saogalemu o Samoa.

Lau Afioga i le Fofoga Fetalai, ou te faafetai i le Afioga i le sui usufono i le taeao lena ua na aumaia le faatoesega i a outou Afioga, leaga e le mama le mea lea. E faatino la le galuega a leoleo, aumai uma i latou o lea na solia le Tulafono, fai i ai iuga leaga e tautala le isi aso mo le isi aso. A le faia i ai latou nei le sala talafeagai, o lona uiga e toe fai foi toe fai foi leaga o le mea na tupu e toe tupu foi.

Lau Afioga i le Fofoga Fetalai, o le ala lena na ou fia oo i ai i se taimi o mulimuli, ae faafetai o lea ua saunoa le sui usufono o le itumalo, ma e aoga foi i ai tatou uma, ia tatou mataala i mea faapenei leaga ua sosolo mai ia uiga faa-fafo. A le mataala ai ia tatou o matai, o le mea lea e oo ia Samoa, ma o tatou lea e mitamita nei, e toe lava o Samoa lea e totoe o nuu uma o le Pasefika o lo o malosi lana aganuu. Ae mafua ona malosi le aganuu, o tatou o matai o lo o puipuia le amio le pulea.

Lau Afioga i le Fofoga Fetalai, o le mafuaaga lea na ou tulai atu ai, ona o le faataua e le Malo le tiute o lo o fai latou o Malu o le Malo mo le puipuiga o le Malo lena o Samoa. O le Malo e Faavae i le Atua, ua fiu faifeau e taumafai e taofi e le mafai. Lau Afioga i le Fofoga Fetalai, o lou toe tulai atu lena ma le agaga faaaloalo, le agaga faaaloalo o lo o faafogafoga mai le atunuu, i a tatou Taualumaga o le Fonotaga lena. O i nei, e alu atu ai foi le tuualalo mo pulega mamalu a alii ma faipule i totonu o tatou itumalo, ia ma e ao foi lava i ai tatou, ona tatou lagolago ma fesoasoani i galuega o lo o taumafai i ai o tatou nuu. O tatou ia tatou iloa ia le tulaga maoae o le puipuiga o le saogalemu e fai foi ma tatou auai i fonotaga, ia ma ave ia le tuualalo i toeaia i le tulaga o le pulega o mea nei o nuu.

Lau Afioga i le Fofoga Fetalai, o lou toe tulai atu lea ma le ava tele i le Fonousu a Samoa.

20 MATI 2018

**Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2018 – faitauga faalua**

**FOFOGA FETALAI:** Malo faafetai, ae ou te le i tuuina atu le avanoa i le sui usufono tu taulaga Faleata Sisifo e pei ona tulai mai e fia saunoa. E avea ia lenei avanoa e momoli atu ai foi se lagona vaivai. E le toe sili se upu a le Fofoga Fetalai o lea ua malele ma saunoa le Taitai o le Malo ma le atunuu, ia aua foi le mataupu e pei ona tulai mai. Faafetai ai foi le tulai mai a le sui usufono mamalu i le matua ia Fonotoe e faaiila foi ma faasilasila i le paia o le Palemene, aua o i i nei la e fia faafofoga mai i ai Samoa po o fea ua taunuu i ai ia le faamoemoe sa tulai mai ai ia le faalavelave aua o le upu lava, ÷e tatou te momoe ma manu e le fati ae sau mala e atiae.ØIa mala la ia, o mala la ia o lea tatou te popole ai aua ne i ou valetuulima leaga na afuafua e o tou tuua ma o tatou matua ma Samoa ia tutoatasi ia tatou maua se Malo Tutoatasi e Faavae i talitonuga Faakerisiano tu ma aganuu ia ma le Tulafono. O le mea la lea e tatou te soifua ma le talitonuga lea, o le talitonuga faakerisiano ma le tatou aganuu.

E momoli atu le faafetai i lau fetalaiga i le matua Fonotoe e a le upu foi lea, ÷e nofo magalafu e iloga malala ola.ØE ui lava i le paia o aiga e tausii aua alo o Malietoa, aua alo o Malietoa Taulapapa ae o lau fatuaiga tausii lenei, o ou faiva alofilima e tuuina ÷e a ulu tafega ae selefutia ai VaisiganoØ O le mea la lea e le tau fautuaina e le Matapia le Manaia. Ae afai o la ua taunuu i ai le faamoemoe, malo faafetai i le fetalaiga ia Ulumu ma Lefaoaseu, ÷ua se togi le seuga ua se lagatila ua faapulou le tualima,Øfaamalo le fai o le faiva, e ui lava ina tuai, ae o le mea sili lenei ua fai. A toe tupu mai se isi mea, faanatinati le faiva lea, e ala ai le fautuaga e le sili se upu a le Nofoa, o lea ua malele le Taitai o le Malo. Leaga e tiga i le faafofoga mai o le atunuu, e i le tumutumu foi o le matou nuu o la e i ai matai tetele la e i totonu o le Ofisa o Leoleo, a aafia loa le Ofisa o Leoleo, ia ua aafia foi ia le matou itumalo. E aoga upu ia e fai atu, e aoga e faafofoga mai ai latou ia o lea e faatupu vevesi.

Ia o le mea sili ma le taua o la ua faafofoga mai le atunuu i le taunuuga o le faamoemoe. Ae tapa ma le faaloalo lau Afioga i le sui usufono o Faleata i Sisifo, tulai mai e saunoa.

**Tofa LEALAILEPULE RIMONI AIAFI (Faleata Sisifo):** Faafetai mo le avanoa i lau Afioga i le Fofoga Fetalai. Malo foi le faapalepale ma le onosai. Ia ae o sina manatu laitiiti i le tatou Tulafono.

Lau Afioga i le Minisita, ou te fia fesili faamolemole po o le a le mafuaaga ua fai ai lafoga i vai, ae o a ituaiga vai ia e aumai ai i i? Aua sa faapea e le tataua ona aafia ai vai. O lea pei e faalauaitetele le aumaiga o le Tulafono ae po o le a le mafuaaga e ala ai ona lavea vai i le vaega lea?

O le isi vaega o pia, o lea e foliga mai e tutusa lafoga a pia e laititi le pasene e i ai ma pia e tetele pasene. O le faiga lea ua fai ai nei, i lou talitonuga e faalaititi le pasene nei encourage pia ia foi ia e laititi pasene ae faatetele ia lafoga a pia ia e tetele ia alcohol content le volume e i ai i totonu, ina ia faapena ona faataugofie ia pia ia e laitiiti le pasene o le pia e laititi le alcohol e i totonu ina ia encourage tagata e inu, ae faataugata pia ia e tele le pasene, ona o lea pei e foliga mai o lea e tutusa.



20 MATI 2018

**Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2018 – faitauga faalua**

O le isi vaega lau Afioga, e pei lava o le mea lea e maitau, e tele lava ina aumai e tax ia mea nei o meaai ia o lea e tele le afaina ai o le soifua maloloina o tagata aemaise ia tulaga talavou. Ae pe a tagai lau Afioga, e i ai meaai foi ia e lau mai nei i fafo meaai lelei mo le soifua maloloina, e taugata tele le tiute la e tuu i ai, ae tatau la ona faapaleni, afai o le finagalo lea o le finagalo o lau Afioga a Matagaluega ia excess ia agavaa pea i tagata uma lautele i meaai nei, o cereal ma meaai faapena ia e lelei mo le soifua maloloina, e tatau la ona aveese ia lafoga, ma mea o fruits ma mea uma faapena ia e lau mai fafo, ina ia paleni ai ina ia mafai la ona o ia e faigofie ona agavaa i mea nei, ae faatuatuanai mea ia lea e finagalo i ai le Malo.

O le isi vaega, e faafefea vaiinu ia e fai i tua lea e faaoga i tua o aoga, lea e fai e gaosi e tagata i fale. O le matua tele o le suka ma e le o healthy le faiga o vai. E tatou te le o iloa le hygiene la e fai ai. O fai la ni tax mo mea nei? Aua e pei o mea nei o lea e lau e tagata i totonu o aoga i aso uma aso uma aso uma, ma e tatau foi la ona tagatagai i ai lau Afioga ma le Matagaluega i vaega lea.

O le isi mea, o mea ia o lafoga ia e faapea mai mo alcohol volume ia e tai 15% o lea e faapea e 15 ma lalo ane, lalo ifo. Ae faafefea la 17% ma luga atu, o fai i ai se fuafuaga? Ia ma le faaaloalo lava faafetai.

**FOFOGA FETALAI:** Malo, faafetai, ia ua manatu o lea ua manino auofala i lenei Tulafono i fetuunaiga e pei ona saunoa ia le Minisita, ia o lea foi ua faaopoopo le Taitai o le Malo, ia o le mea lea, tapa lau Afioga i le Minisita e talifuaitau i nisi o mea sa laga.

**Afioga Hon TIALAVEA FEA LENIU TIONISIO HUNT:** Faafetai i lau Afioga i le Fofoga Fetalai, faafetai i le sui usufono mo Anoamaa Sisifo mo fautuaga. O le taimi lenei o lo o galulue le Matagaluega e toe review atoa ia le tatou tariff sau se taimi e agai atu i luma ona aumai lea o se iuga o lea galuega o lo o feagai ma le Matagaluega i le taimi nei.

A o le sui usufono o Faleata Sisifo, o lena e eseese, o pia o le malosi i luga atu o le 15% e 100% le excise tax, e tusa e \$38.60 le excise o le sipili, e amata atu i ina le sipili. O le pia foi lena e i lalo lona tau, e 3% le malosi o le alcohol lena e \$3.08 ae o le vaega lena e i luga atu o le 3% lea e i ai le 4 ma le afa 6, 7 na e \$5.44 le excise, o lena e eseese ia excise o eseese o malosi o le ava malosi. Ae gata la ia le tariff o le 15% le malosi o le alcohol e 15% na e gata ai ia le tariff lea, a o luga atu, na e sau i le Tulafono mulimuli lena ua faaopoopo ai le \$38.60 i le lita o le tariff, masalo po o le fono a taeao e sau ai ia le Tulafono lea. Ia pei o le tali atu lena i le faamalalamaga lau Afioga i le Fofoga Fetalai.

**FOFOGA FETALAI:** Malo, faafetai.

**Afioga SULAMANAIA FETAIAI TAUILILI TUIVASA (Vaimauga Sasae):** Lau Afioga i le Fofoga Fetalai, pe maua se avanoa.

20 MATI 2018

**Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2018 – faitauga faalua**

**FOFOGA FETALAI:** Ua uma avanoa.

**Afioga SULAMANAIA FETAIAI TAUILILI TUIVASA:** Ia na o sina tala e fai atu foi i lenei foi Tulafono ua ou lagolagoina ia ae ona o le tulaga lea sa malele ai foi le Afioga i le Taitai foi o le tatou atunuu i le faalavelave lea pei sina tamai taimi lava o lenei sui usufono lau Afioga.

**FOFOGA FETALAI:** Ia malie le sui usufono, sa le tatau foi ona fai sau upu, ae ona o au o le Fofoga Fetalai, leaga o lea ua laga le mataupu i le Palemene, na ala ai ona maua lou avanoa. Ae a malele le Taitai o le Malo le Afioga i le Palemia, ua uma. Ia e faamalulu atu la i le sui usufono mamalu.

**Afioga Sulamanaia Fetaiai Tauiili Tuivasa:** O le faatoesega lau Afioga, o le faatoesega le mea lea e tau fai atu e lenei itumalo.

**FOFOGA FETALAI:** A lea, e tele le upu lea na ou fai atua, nofo i magalafu e iloga malala ola, a lea ua aumai le faatoesega e fai ma sui o outou. O le mea la lea, e faamalulu atu, leaga o le a ou toe soli lava e au ia le tatou Tulafono Tumau pe a ou toe tuu atua le avanoa. O lea ua saunoa le Minisita, ia o lea ua faapupula nisi o mea, sa tatau ona faaemo mai se moli o lena e tou te fia saunoa. O le mea la lea ou te faamalulu atu i le sui usufono mamalu, atonu o lea o le a tatou see atu e auiliili le Tulafono, e lua la avanoa e tai 15 minute, ia ona tatou paleni ai lea i ina.

*Na faamaonia le lafo ma faitauina le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2018 i lona faitauga faalua.*

**TULAFONO TAU FAAOFI O TEUTEUGA O LE TULAFONO O FUA FAATATAU O LAFOGA O OLOA E GAOSIA I LE ATUNUU 2018 – iloiloga auiliili**

**FOFOGA FETALAI:** E tusa ai ma Tulafono Tumau e amata ia iloiloga auiliili i le Fuaiupu e 2.

**FUAIUPU 2:** Ua teuteuina le Faamatalaga.

*Faamaonia.*

20 MATI 2018

**Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2018 – iloiloga auiliili**

**FUAIUPU 1 MA LE IGOA:**

**FUAIUPU 1 Igoa puupuu ma le amataga.**

**IGOA: Teuteuga o le Tulafono o Fua Faatatau o Lafoga o Oloa e Gaosia i le Atunuu 2018.**

*Faamaonia.*

*Na faagasolo le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2018 e aunoa ma se Teuteuga.*

**TULAFONO TAU FAAOFI O TEUTEUGA O LE TULAFONO O FUA FAATATAU O LAFOGA O OLOA E GAOSIA I LE ATUNUU 2018 – faitauga faatolu**

**Afioga Hon TIALAVEA FEA LENIU TIONISIO HUNT:** Lau Afioga i le Fofoga Fetalai, ou te tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fua Faatatau o Lafoga e Gaosia i le Atunuu 2018 i lona faitauga faatolu.*

*Faaluaina e le Minisita mo Faatoaga, Vaomatua ma Faigafaiva.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaio Faitulafono.*

**TULAFONO TAU FAAOFI O LE OFISA O TAALOGA A LE PASEFIKA 2018 – faitauga faalua**

**FOFOGA FETALAI:** Talu ai ua taulimaina le Tusi Faamaonia o le Tulaga Faanatinati ua maea ona sainia e le Taitai o le Maota, o lea o le a sagai atu ai loa le Fono Aoaio mo le faitauga faalua o le Tulafono Tau Faaofi.

Tulai mai lau Afioga i le Minisita mo Aoga, Taaloga ma Aganuu.

**Afioga Hon LOAU SOLA KENETI SIO (Minisita mo Aoga, Taaloga ma Aganuu):** Faafetai lau Afioga i le Fofoga Fetalai. Ma ou te tulai atu ma le agaga faaaloalo e faatu le lafo, *Ina ia faitauina nei le Tulafono Tau Faaofi o le Ofisa o Taaloga a le Pasefika 2018 i lona faitauga faalua, ma ou te fia tautala faamalalalama i ai.*

*Faaluaina e le Minisita o Tupe ma le Minisita mo Tupe Maua.*

20 MATI 2018

**Tulafono Tau Faaofi o le Ofisa o Taaloga a le Pasefika 2018  
– faitauga faalua**

**FOFOGA FETALAI:** Ou te tapa lau Afioga i le Minisita mo Aoga, Taaloga ma Aganuu mo lau saunoaga faamalamalama.

**Afioga Hon LOAU SOLA KENETI SIO:** Faafetai i lau Afioga i le Fofoga Fetalai.

O lenei Tulafono e faavae ai ia le tatou Taaloga foi lea ua faapena ona ogatasi foi le faafitiga o aleaga o le a faia iinei i le tatou atunuu ma host e le tatou atunuu ia Taaloga a le Pasefika i le 2019 i le tausaga lea o le a sau, ma e le mafai la ona faatinoina lena tulaga pe a leai se Tulafono. O le ala la lea ua faapena ona faavae le Tulafono pei ona i ai i lenei taeao lau Afioga i le Fofoga Fetalai. E faavae ai le Ofisa o Taaloga a le Pasefika ma aiaia ai mo ana galuega tauave ma malosiaga lau Afioga, ia ma faavae ai foi le Komiti Faatonu ma le Pulega ma le Komiti Faafoe o Taaloga a le Pasefika ma ana galuega tauave. Ia aiaia ai ma lagolago aloaia e mo Taaloga a le Pasefika 2019, lau Afioga.

E pau lava lea o se Tulafono lau Afioga ina ia faapena ma mafai ona faavae ai le Ofisa lenei ma tauave ona tiute, e le umi tele lava na o le 40 lava ona fuaiupu e le o se Tulafono umi.

E pei o le agaga lena ua ou tulai atu ai ma le agaga faaaloalo i lenei taeao ma le ava tele.

**FOFOGA FETALAI:** Malo faafetai. Ia se i vagana ai se sui usufono e le i ai i le tatou semina i le aso ananafi ona maua lea o sona finagalo e toe fia saunoa ai pe afai e le i malamalama lelei le faamalamalama e faauluuluga o Matagaluega.

**Tofa Hon LAUOFO FONOTOE NUAFESILI PIERRE LAUOFO:** Lau Afioga i le Fofoga Fetalai...

**FOFOGA FETALAI:** Ia malie la le sui usufono mo Anoamaa Sisifo, se i tuu atu la le avanoa i le sui usufono lea sa matou faatasi ai i le matou semina lea ua tulai mai, le sui usufono mo Salega Sasae.

**Tofa OLO FITI AFOA VAAI (Salega Sasae):** Faafetai lava i lau Afioga i le Fofoga Fetalai. E moni lava sa tatou faatasi, ae pei e le i maua uma ia nai fesili na tuuina atu ona e le i umi foi ona auai le Afioga i le Minisita.

E leai e le o ni upu e avane ai le taeao ma o le Minisita o se Minisita matautia le Minisita, ua tele foi matatia ua ausia e lau Afioga talu ona e tulai mai. Malo lava le faatoatoa ma le tulaga foi i le tulaga o le faamoemoe pei ona tulai mai.

Na o ni nai fautuaga lava ma nai fesili e tasi i lau Afioga, ona o lea e tilotilo atu i le Tulafono e i ai ia tulaga foi lea o le tuusaunoa o tiute i e autovaa mai i le faamoemoe, ia se i silasila lelei ai i le vaega lena.

20 MATI 2018

**Tulafono Tau Faaofi o le Ofisa o Taaloga a le Pasefika 2018  
– faitauga faalua**

E i ai lava nai mea foi ia e mafai ona nana mai ona o tulaga o le saogalemu o le tatou atunuu, ne i te i foi ua aumai faaalu i le tatou green lane foi lea, ae le maua ai le tele o nisi mea. E oo foi i le soifua maloloina, ia tasi foi lenei vaega lau Afioga, ia faamalosi ma faamautu lelei a tatou vaega na, ona o lenei foi vaitau i le tele o faamai pipisi ma tulaga faapena e ono aafia ai si o tatou atunuu.

O le isi vaega taua lea o le faatinoga o le tatou faamoemoe lea, o le mea lea o le faamauiina o faamaumauga, aemaise o tatou tupe maua e lea faamoemoe o Taaloga a le tatou Pasefika, ona e i ai foi tulaga sa aliae mai i le Taaloga muamua i le 2007, o le mea lea o le leiloloa o laptops ma mea faapena sa i ai faamaumauga, ia ma tatou oki atu ai lava i lenei mea. Ae fautuaina lau Afioga foi lele, a i ai ni computer foi ia vaeatu le paia o le Maota ma le faafofoga a le atunuu, e toe ave ifo ni nati e nati lelei ai i lalo ne i te i ua alu le computer, o le fautuaga lenei lau Afioga. Fai se computer malo foi lele ma se computer mamafa ia aua ne i mafai ona sii pe leiloa.

Ae o lau fesili lau Afioga i le Minisita....

**FOFOGA FETALAI:** Se i tulai mai le sui usufono mo Palauli le Falefa.

**Afioga Hon Faumuina Tiatia Faaolatane Liuga (Palauli le Falefa):** Lau Afioga i le Fofoga Fetalai ma lou faaaloalo, ou te fia faasaoina ai le saunoaga a le sui usufono mamalu, e leai ni computers na leiloloa i le taimi o taaloga, na fai le audit, na audit lelei accounts. O computers ia sa e faapea e le i i ai i totonu o le ofisa, o computers na donate i le SASNOC mo le faaauauina o taaloga nei. O le tupe sa totote e le i faaaogaina ma mea uma faapena, e ova i le \$8miliona le tupe e le i faaaogaina. E leai, leai, leai se mea na leiloa. O la e i ai le audit. Ma lou faaaloalo lava.

**FOFOGA FETALAI:** Ia masalo o lea ua manino le faasaoga. Ua galo foi ia ta ita o le taimi o le toeaia sa feagai ma le tulaga lea.

**Tofa OLO FITI AFOA VAAI:** O le ala lenei ua ou tau te i atu po o le a se mea ua tulai mai ai ua galo ia te au o le Afioga foi i le sui usufono mo Palauli le Falefa sa gafa foi ma lea vaega. Ia pei sa ta matamata foi i Tala o le Tupe i lenei vaitaimi, ia e tele ia o si gau na i ai. O le a le afaina lea o le a ma le finau ma ma toe foi i tua i mea....

**FOFOGA FETALAI:** Ia malie ia le sui usufono, e a pe a aua le toe foi i tua lau saunoaga i tua i le mea lea o le...e na o le ofisa lava lea e fai nei mo le Pasefika.

**Afioga Hon Faumuina Tiatia Faaolatane Liuga:** O le faasaoga o le saunoaga leaga o lea e faamaumau i a tatou Faamaumauga. E \$8,400,000 le tupe na totote.

20 MATI 2018

**Tulafono Tau Faaofi o le Ofisa o Taaloga a le Pasefika 2018  
– faitauga faalua**

A silasila le sui usufono o saunoa nei, e \$3,500,000 na ave e fesoasoani ai i le Tala Faaopoopo Muamua o le Tupe o le Tausaga Faaletupe 2007 i le 2008. Ma lou faaaloalo lava.

**FOFOGA FETALAI:** E sao lelei le saunoaga a le sui usufono mo Palauli le Falefa.

Ia malie le sui usufono e faapupuu mai loa le saunoaga, aua e le o toe umi foi sou taimi.

**Tofa OLO FITI AFOA VAAI:** Ia o le a ou le toe foi i le itu lea. A o lau faafesili lea lau Afioga i le Fofoga Fetalai i le Afioga i le Minisita, e ese le Ofisa o Taaloga lea ua aumai ai nei le Tulafono, ese le Ofisa lea ua i ai i le taimi lenei. Pei o lea e le o faafofoga mai le Afioga i le Minisita lau Afioga.

**FOFOGA FETALAI:** Masalo o le a saunoa atu le Minisita i se taimi mulimuli.

**Tofa OLO FITI AFOA VAAI:** Pei o lea e faafesili atu, pe ese le Ofisa o Taaloga lea aumai ai le Tulafono, ese le Ofisa lea ua i ai i le taimi nei?

**FOFOGA FETALAI:** A tali loa le Minisita ua uma loa lou taimi.

**Tofa OLO FITI AFOA VAAI:** Ia o le a toe sosoo atu la. Ona o lea ua foliga mai o lea ua....

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai e sili ia ona ou tali ona o lea ou te....leaga e eseese mea e lua.

**FOFOGA FETALAI:** Ia saunoa e fesoasoani mai.

**Afioga Hon Faumuina Tiatia Faaolatane Liuga:** O le Tulafono lea o le Tulafono o Taaloga. O le vaega lea e i ai nei, na o le vaaaiga lava o fale ma malae taalo, o le authority e vaaia ia malae ma fale taalo, e le o se Ofisa o Taaloga a le Pasefika. Ma lou faaaloalo.

**FOFOGA FETALAI:** Malo faafetai.

**Tofa OLO FITI AFOA VAAI:** Faafetai. E leai, e malamalama lelei lava le sui usufono o Salega Sasae i le tulaga lea, o lea ua i ai le authority na i le taimi lenei, a o lea ua amata a latou galuega a o lea faatoa oo mai le Tulafono e faatulafonoina ai le Authority lea. Pei o le uiga lenei o lau fesili. Ae a faapea sa fai muamua, ia sa solitulafono foi na mea sa fai muamua pe a faapea o le tulaga lenei sa i ai.

20 MATI 2018

**Tulafono Tau Faaofi o le Ofisa o Taaloga a le Pasefika 2018  
– faitauga faalua**

**FOFOGA FETALAI:** A o lea sa faamalamalama ananafi e le Faauluuluga o le Matagaluga, ioe, aua sa le tatau ona ou tuu atua le avanoa aua sa tatou faatasi ananafi ae leaga e fai ma e alu i au pisinisi ae le se i fai lelei ona o tatou o sui usufono se i tatou nonofo lelei e vaai a tatou mea faapena. Ia se i i ai se taimi ona tali atu lea o le Afioga i le Minisita. Ia tapena lau Afioga i le Minisita e tali i le saunoaga a le sui usufono sinia o lea itu o le Maota.

**Tofa OLO FITI AFOA VAAI:** Ae malie lau Afioga i le Fofoga Fetalai, o au nei na faatonu mai au e lou itumalo ou te lauga ma ou fesili i totonu o le Malae lenei o Tiafau, faafetai.

**FOFOGA FETALAI:** Malo, e faamalulu atu foi i lau Afioga i le sui usufono mamalu o le sui usufono sinia, ioe, ae faapea ua lava le faamalamalama a le sui usufono o Palauli le Falefa e manino ai, ae o lea, ia tapena le tali a le Minisita.

Tulai mai le sui usufono mo Anoamaa Sisifo.

**Tofa Hon LAUOFO FONOTOE NUAFESILI PIERRE LAUOFO:** Lau Afioga i le Fofoga Fetalai, ua malamalama foi lou sui usufono i le Tulafono Tau Faaofi. E pau lava o lea, e tulai e fia faamauina le agaga faafetai i le Malo ina ua ofoina lo tatou Malo e talimalo i Taaloga nei a le Pasefika. Aua o lea sa maua e faapea o Tonga lea sa tuu e talimalo sa ave i ai le avanoa, ae peitai, o mafuaaga lava a latou, ua le mafai ai. A o lea la, faamalo faafetai i lau Afioga i le Minisita ma le Faigamalo ua mafai ona tatou talimalo ma faaoga lelei lenei avanoa. Ou te lagolagoina lenei tulaga ma taaloga faapenei, e maua ai ia galuega a tagata, ia ma maua ai tupe i latou ia e faimalaga mai i totonu o le atunuu aua ia taaloga. E manuia ai ia tagata e fai taavale, manuia ai le aufai taxi, pei o le sui usufono o Salega Sasae e fai lana fale taxi e maua ai ana tupe, o tulaga uma faapena. O lea la ua ou tilotilo atu i le Tulafono, faafetai i lau Afioga i le Minisita, o lea ua e tulai mai e te Taitaifono pe taitai Komiti e faafoe po o le Komiti e faamaopoopoa ia taaloga. Ona o lea ou te manatua, o lea foi sa i ai lau Afioga i le Komiti Faafoe o le tapenaina o le Taaloga a le Pasefika 2007, o lea ou te manatua sa i ai ma isi fonotaga sa tatou i ai faatasi. O lona uiga la, o a uma ia ni atugaluga ia e faafofoga atu i ai, e i ai lou talitonuga, se ua e silafia ma e malamalama uma i mean a. O lona uiga, tapena ia lelei a tatou taaloga. Masalo e le toe tele nisi galuega tetele, aua o lea ua i ai a tatou fale taalo ma malae taalo ma tulaga faapena. Ae pau lava lea o se fesili, e fia sina seleni lea e fuafua i le Tala Faatatau o le Tupe lea e lumanai nei e amata ai le tatou faamoemoe lea? A o le tulaga ia, e matua lagolagoina e lou sui usufono.

E pau lava le isi mea mulimuli lau Afioga i le Minisita se i toe silasila ane lava i ai, o lea e aumai i le Tulafono o le aso 31 o Tesema 2019, e uma ai le aoga o le Tulafono. Se i toe silasila lava i le tulaga lea ona e i ai mea o vaega ia o le Tulafono e i ai moliaga faasolitulafono.

20 MATI 2018

**Tulafono Tau Faaofi o le Ofisa o Taaloga a le Pasefika 2018  
– faitauga faalua**

E i ai foi faiga faapisinisi ma mea faapena, ne i uma le aoga o le Tulafono, ae le i amatalia ona faataunuu pe faatino nisi o fuafuaga ia, ae ua leai se Tulafono e faavae ai na fuafuaga uma. Se i toe silasila ane i ai, o lena e i ai mo savings provision ae pei e agai i mea o tapenaga ma faaiuga la e fai i le taimi nei, ae le i pasia le Tulafono. A o le taimi la lea e muta ai le Tulafono, pei o tulaga na. Na ona toe fautua atu ai faapena, se i toe silasila ane lau Afioga, ae faafetai mo le avanoa. Lau Afioga i le Fofoga Fetalai, e faamauina le faafetai o le tatou talimalo.

**FOFOGA FETALAI:** Malo faafetai. Ia tulai mai la le sui usufono o le Itumalo Tu Taulaga i Sisifo.

**Afioga FAUMUINA ASI PAULI WAYNE FONG (Itumalo Tu Taulaga Sisifo):** Faafetai i lau Afioga i le Fofoga Fetalai mo le avanoa, e faamalulu atu foi sa auai ananafi i le tatou mafutaga, ae sa i ai lava nai fesili sa tuu mo lenei aso lau Afioga.

Ia silasila foi lau Afioga i le Taaloga a le Pasefika na tuanai atu nei, ia e tele ia o tatou fale taalo sa fauina. Na o se tuualalo lea e tau avatu i le Afioga i le Minisita, ina ia toe tilotilo lelei i Tauofoga mo nisi fale taalo fou, po o nisi foi fale o le a toe fausia mo lenei taaloga, ona o tulaga lea i konekarate foi sa i ai i lena vaitaimi, pei sa faatatope ona fai a tatou galuega. E i ai foi isi konekarate ua uma lava taaloga e le i totogia lava e le tatou Pacific Games i lena vaitaimi. E i ai foi tulaga na oo foi i le faamasinoga le tele o nisi o konekarate sa i ai, ae talitonu le agaga e le masalosalo lenei sui usufono i lau Afioga i le tulaga lea. Ou te iloa o lea ua maioio ma tagai lelei i ai le Komiti aemaise foi lau Afioga i le Taitaifono mo le agai i luma. Ou te talitonu foi o lea e i inei i le itumalo lenei le tele o taaloga o le a oo mai i ai. Ia, taumafai mai pe i ai nisi o le nuu nei po o nisi o le itumalo nei e manaomia i lau Komiti. O lea ou te tilotilo atu i i le tele o fesoasoani, volunteers, a o lea e taumafai atu mo nisi e leoleoina a tatou taaloga, e fesoasoani foi i le Ofisa o Leoleo o lo o i ai i le taimi nei.

Na pau lea o se tuualalo lau Afioga, ae ia manuia lava le Pacific Games i le 2019. Ma le faaaloalo lava, faafetai.

**FOFOGA FETALAI:** Malo faafetai. Ia, se i tulai mai le Afioga i le Palemia ona tulai mai ai lea o le Minisita.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, o lo o i ai le tatou Komiti foi o Tauofoga e vaai latou i ia mea, ae taua le fautuaga ua aumai. Na pau lava le mea ia silafia e le Maota lenei, o le tausaga e 2007 na fai ai taaloga ia e saunoa i ai le sui usufono. E i ai la nai fale na iloa e le i atoatoa, aemaise lava le Gym No.3 na tutulu, ia na toe fai faalelei lava mulimuli ane ai.



20 MATI 2018

**Tulafono Tau Faaofi o le Ofisa o Taaloga a le Pasefika 2018  
– faitauga faalua**

Mai le taimi lena, na toe fai foi lea o taaloga o le 2015 lea foi sa fai mai iinei taaloga a le Taupulega, Commonwealth mo i latou talavou, sa toe faaleleia ai foi isi fale. Ae i ai lava le tulaga e tulai mai, e oo lava i mea o... latou ua atoa ua matua maoae i le mea leni o le fausaga o fale, ia o lea tou te silafia na faalauaitele mai foi i nusipepa a Niu Sila le anoano o fale fogafale fia sa fau e isi kamupani faufale ua fia...ua selau tausaga talu ona faatino a latou kamupani, ae na tutulu foi.

O le faaiuga o le vaiaso le la lea na tatou vaavaai ai i le mea na tupu i le Malo o Amerika i auala sima, aualalaupapa foi ia e fau faa-aualalaupapa, e le i atoa le 5 aso na tatala ai ae palalasi uma i lalo, oti tagata. Lau Afioga i le Fofoga Fetalai, a o le atunuu e i ai inisinia maoae ua oo i le masina a latou vaa tetele ua fau. Ae oo lava i nei mea o aualalaupapa, o lea ua collapse uma i lalo, ua fia piliona ma piliona ua maumau.

O le mea la lea lau Afioga i le Fofoga Fetalai, e i ai lava mea faapena ua tutupu o lo o i ai foi le Komiti, o le matua Komiti lava o lauia le Komiti lea e i ai, ae lelei lava le faamanatu leaga e i ai lava mea e tutupu. O la e ua taoto le faamanatu, e taua tele le faamanatu lea ina ia silafia foi e i latou o lo o peti mai, o lo o mataala pea le Komiti o Tauofoga.

**FOFOGA FETALAI:** Malo. Ia se i tulai mai le Minisita e talifuaitau i mea sa laga e sui usufono mamalu e tusa ai o lau Tulafono Tau Faaofi.

**Afioga Hon LOAU SOLA KENETI SIO (Minisita mo Aoga, Taaloga ma Aganuu):** Faafetai lava i lau Afioga i le Fofoga Fetalai mo le avanoa. Ou te tulai atu foi e tali foi. Ia, e toatolu sui usufono na latou sausaunoa foi e tusa ai ma le Tulafono Tau Faaofi puupuu. O lau maitau atu foi i saunoaga a sui usufono, sole, o le tuualalo ma fautuaga, ioe. E le o i ai se agaga foi lea. O lona uiga o la e i ai lo latou agaga lea e lagolago le Tulafono Tau Faaofi. O le mea lea, se e sau lava le uli e toa ai le moa. Ioe, o lata lea faalogologo atu. Malo le saunoa, lagolago le tatou Tulafono Tau Faaofi, aua o taaloga ia, o taaloga a Samoa, ioe, e le o se taaloga a le Minisita. O lona uiga, e tataua ona tatou omai e lagolago aua foi le silasila mai a le lalolagi atoa. Ioe. A o nei i le taeao na ou sau ai ae laga mai sui usufono fai mai; òLoau, e te alu i le fusuaga lea a Joseph Parker?ō Ou fai atu i ai, òSe ua uma ona ma talanoa ma le toeaina fai mai, Loau nofo ia leaga o lea ua agi Gita, e tele foi tupe e alu ai.ō Ae tou te omai lava fai mai, se, e tataua lava ona e alu Loau, ioe, le aualii ia. O le mea la lea, ia se i ou toe musumusu i le toeaina, ioe.

O le mea lea, lau Afioga, o le tali lena, ae faafetai lava mo le lagolago o a tatou taaloga. Ma le agaga faaloalo.

**FOFOGA FETALAI:** Faafetai. Ia, se i tautuana o le aualii lava lena e faasea ma fai ou tala. Malo faafetai.

*Na faamaonia le lafo ma faitauina le Tulafono Tau Faaofi o le Ofisa o Taaloga a le Pasefika 2018 i lona faitauga faalua.*

20 MATI 2018

**Tulafono Tau Faaofi o le Ofisa o Taaloga a le Pasefika 2018  
– iloiloga auiliili**

**FOFOGA FETALAI:** Talu ai ona o lea ua tatou taunuu i le tatou malologa masani, o le a faataatiaese Galuega a le Fono Aoa mo lana malologa masani.

*Na faataatiaese Galuega a le Fono Aoa mo lana malologa masani i le itula e 10:44 ma toe faaauau i le itula e 11:34 i le taeao.*

**FOFOGA FETALAI:** Ou te faasilasila atu ua toe amatalia Taulumaga ma Fonotaga a le Fono Aoa Faitulafono ma le Palemene. Malo le tauatai ma le onosai ua maua le faaopoopoga o le faasiliga malosia e faaauau ai le galuega.

**TULAFONO TAU FAAOFI O LE OFISA O TAALOGA A LE  
PASEFIKA 2018 – iloiloga auiliili**

**FOFOGA FETALAI:** E tusa ai ma le Tulafono Tumau, e amata le iloiloga auiliili i le Fuaiupu 2.

**FUAIUPU 2: Faamatalaina o uiga o upu.**

*Faamaonia.*

**FUAIUPU 3: Faavaeina o le Ofisa.**

*Faamaonia.*

**FUAIUPU 4: Galuega tauave ma malosia.**

*Faamaonia.*

**FUAIUPU 5: O le Faa-Tamā ma le Faa-Tautai o Taaloga.**

*Faamaonia.*

20 MATI 2018

**Tulafono Tau Faaofi o le Ofisa o Taaloga a le Pasefika 2018  
– iloiloga auiliili**

**FUAIUPU 6: Komiti Faatonu o Pulega.**

*Faamaonia.*

**FUAIUPU 7: Ofisa Sili o Pulega.**

*Faamaonia.*

**FUAIUPU 8: Aufaigaluega ma tagata faigaluega o le Ofisa.**

*Faamaonia.*

**FUAIUPU 9: Komiti Faafae.**

*Faamaonia.*

**FUAIUPU 10: O tagata e ofo e galulue fua mo taaloga.**

*Faamaonia.*

**FUAIUPU 11: Faatinoina o malosiaga mo tulaga faanatinati.**

*Faamaonia.*

**FUAIUPU 12: Tuuina atu o malosiaga.**

*Faamaonia.*

**FUAIUPU 13: Faamalumaluga ma puipuiga mausali.**

*Faamaonia.*

20 MATI 2018

**Tulafono Tau Faaofi o le Ofisa o Taaloga a le Pasefika 2018  
– iloiloga auiliili**

**FUAIUPU 14: Fuafuaga autasi ma lipoti faaletausaga.**

*Faamaonia.*

**FUAIUPU 15: Faaputugatupe a le Ofisa.**

*Faamaonia.*

**FUAIUPU 16: Aseta a le Ofisa.**

*Faamaonia.*

**FUAIUPU 17: Faamatalaga tau tupe a le Ofisa.**

*Faamaonia.*

**FUAIUPU 18: E mafai e le Ofisa ona faataga faasalalauga ma faamaumauga o taaloga.**

*Faamaonia.*

**FUAIUPU 19: Solia o aia tatau a vaega faasalalauga.**

*Faamaonia.*

**FUAIUPU 20: Faatagaga e faaaogā ai faailoga ma Faailoilo Tau Taaloga.**

*Faamaonia.*

20 MATI 2018

**Tulafono Tau Faaofi o le Ofisa o Taaloga a le Pasefika 2018  
– iloiloga auiliili**

**FUAIUPU 21: Faaaogāna o Faailoga ma Faailoilo Tau Taaloga.**

*Faamaonia.*

**FUAIUPU 22: Faaaogaina faasolitulafono o Faailoga ma Faailoilo Tau Taaloga.**

*Faamaonia.*

**FUAIUPU 23: Puipuiga o isi meatotino tau le atamai.**

*Faamaonia.*

**FUAIUPU 24: Tagata lagolago aloaia.**

*Faamaonia.*

**FUAIUPU 25: Maliega mo le lagolagoina o taaloga.**

*Faamaonia.*

**FUAIUPU 26: Sone mo faasalalauga faatosina.**

*Faamaonia.*

**FUAIUPU 27: Aia Tatau e Faia ai Igoa.**

*Faamaonia.*

20 MATI 2018

**Tulafono Tau Faaofi o le Ofisa o Taaloga a le Pasefika 2018  
– iloiloga auiliili**

**FUAIUPU 28:** Amio faasolitulafono e foliga mai o se lagolago i taaloga po o se pule faataga.

*Faamaonia.*

**FUAIUPU 29:** Faalavelaveina o Taaloga.

*Faamaonia.*

**FUAIUPU 30:** Faaogaina o tulaga aloaia faaetulafono i totonu ma fafo atu o Samoa.

*Faamaonia.*

**FUAIUPU 31:** Faoa faamalosi o meafaigaluega faasolitulafono.

*Faamaonia.*

**FUAIUPU 32:** O isi gaoioiga ua solia ai leni Tulafono.

*Faamaonia.*

**FUAIUPU 33:** Faailoaina atu ma le faaaogāina sese o faamatalaga.

*Faamaonia.*

**FUAIUPU 34:** Tulafono Faatonutonu.

*Faamaonia.*

20 MATI 2018

**Tulafono Tau Faaofi o le Ofisa o Taaloga a le Pasefika 2018  
– iloiloga auiliili**

**FUAIUPU 35: Aso e muta ai le aogā o le Tulafono.**

*Faamaonia.*

**FUAIUPU 36: Tuusaunoaga mai lafoga.**

*Faamaonia.*

**FUAIUPU 37: Toesea o lafoga i lalo o le Tulafono o Lafoga o Tupe  
Maua 2012.**

*Faamaonia.*

**FUAIUPU 38: Tiute o le Ofisa o Tiute.**

*Faamaonia.*

**FUAIUPU 39: Aiaiga tau soloaiga ma aiaiga faasaoina.**

*Faamaonia.*

**FUAIUPU 40: Teuteuga faatupulaia.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Tulafono o le Ofisa o Taaloga a le Pasefika 2018.**

*Faamaonia.*

*Na faagasolo le Tulafono Tau Faaofi o le Ofisa o Taaloga a le Pasefika  
2018 e aunoa ma se Teuteuga.*

20 MATI 2018

**TULAFONO TAU FAAOFI O LE OFISA O TAALOGA A LE  
PASEFIKA 2018 – faitauga faatolu**

**Afioga Hon LOAU SOLA KENETI SIO:** Ia, e manatu foi lau Afioga i le Fofoga Fetalai o lea ua maea ona palegaaau le taliga o le sua mo se faasiliga malosi foi a le Maota aua tiute o totoe o lenei aso.

Ae ua ou tulai atu ma le ava tele e faatu le lafo, *Ina ia faitauina nei le Tulafono Tau Faaofi o le Ofisa o Taaloga a le Pasefika 2018 i lona faitauga faatolu.*

*Faaluaina e le Minisita mo Faamasinoga ma Pulega Tau Faamasinoga.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa Fautulafono.*

**TULAFONO TAU FAAOFI O TEUTEUGA O LE FAAVAE (NU.2)  
2018 – faitauga muamua**

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, ou te tulai atu ma le faaaloalo ou te faatu le lafo, *Ina ia faitauina nei le Tulafono Tau Faaofi o Teuteuga o le Faavae (Nu.2) 2018 i lona faitauga muamua.*

*Faaluaina e le Minista mo Pisinisi, Alamanuia ma Leipa.*

*Na faamaonia le lafo ma faitauina le Tulafono Tau Faaofi i lona faitauga muamua.*

**TULAFONO TAU FAAOFI O TEUTEUGA O LE TULAFONO O  
GALUEGA TINEI MU MA FAALAVELAVE TUTUPU FAAFUASEI  
2017 – iloiloga auilili**

**Afioga ALIIMALEMANU ALOFA TUUAU (Taitaifono Komiti o Tupe Maua ma Tupe Totogi):** E faatalofa atu i lau Afioga i le Fofoga Fetalai, faapea foi i sui usufono mamalu o le Palemene faapea foi sui o Matagaluega ma auaunaga eseese o lo o tatou mafuta i lenei taeao.

Lau Afioga i le Fofoga Fetalai, ou te tulai atu e faatu le lafo, *Ina ia faamaonia e le Fono Aoa le Lipoti a le Komiti o lo o fautuaina ai, ina ia faagasolo le Tulafono Tau Faaofi o Teuteuga o Galuega Tinei Mu ma Faalavelave Tutupu Fafuasei 2017 faatasi ma le Teuteuga ma le Faasaoga.*

*Faaluaina e le sui usufono mo Palauli le Falefa.*

*Na faamaonia le lafo.*



20 MATI 2018

**Tulafono Tau Faaofi o Teuteuga o le Tulafono o Galuega Tinei Mu ma Faalavelave Tutupu Faafuasei 2017 – iloiloga auiliili**

**FOFOGA FETALAI:** E faasilasila atu ua faamaonia nei e le Fono Aoa le Lipoti a le Komiti o Tupe Maua ma Tupe Totogi i le Tulafono Tau Faaofi o Teuteuga o le Tulafono o Galuega Tinei Mu ma Faalavelave Tutupu Faafuasei 2017.

E tusa ai ma le Tulafono Tumau, e amata le iloiloga auiliili o le Tulafono Tau Faaofi i le Fuaiupu e 2.

**FUAIUPU 2: Ua teuteuina le fuaiupu 2.**

*Faamaonia.*

**FUAIUPU 3: Ua teuteuina le fuaiupu 41(2).**

**FOFOGA FETALAI:** O lo o i ai le Teuteuga a le Komiti i le Fuaiupu 3. Tulai mai le lau Afioga i le Taitaifono o le Komiti.

**Afioga ALIIMALEMANU ALOFA TUUAU:** Lau Afioga i le Fofoga Fetalai, ou te faatu le Teuteuga i le fuaiupu 3 e faapea:

**“TEUTEUGA:**

**I le Lomiga Samoa:**

- (a) *Ia aveese upu **ōso o se**” ma suia i le upu **ōfaatonuina**”.*
- (b) *Ia faaofi i le parakalafa (p) i le tuanai ai o upu **“faagaoioiga o galuega vevela”** ia upu nei:-*

**“ma faatonuina faasalaga mo le le mulimulitaia o aiaiga o pemita o le a tuuina atu”** ma faitauina ai le (p) e faapea:

**“(p) ia faatagaina le Pulega o Galuega Tinei Mu ma Faalavelave Tutupu Faafuasei a Samoa e tuuina atu pemita mo so o se faagaioiiga o galuega vevela ma faatonuina faasalaga mo le mulimulitaia ma aiaiga o pemita o le a tuuina atu”.**

20 MATI 2018

**Tulafono Tau Faaofi o Teuteuga o le Tulafono o Galuega Tinei Mu ma Faalavelave Tutupu Faafuasei 2017 – iloiloga auiliili**

**English Version:**

**1. Clause 3:**

- a) Delete “any” and replace with “prescribed”
- b) Insert after “operations” the following:-

**“and prescribed penalties for non-compliance with conditions of permits to be issued” the amendment should be read as:**

**“(p) to authorize the Samoan Fire And Emergency Services Authority to issue permits for prescribed hot works operations, and prescribed penalties for non-compliance with conditions of permit to be issued”.**

*Faamaonia le Teuteuga.*

*Faamoania le Fuaiupu 3 e pei ona Teuteuina.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Teuteuga o le Tulafono o Galuega Tinei Mu ma Faalavelave Tutupu Faafuasei 2017.**

**FOFOGA FETALAI:** O lo o i ai le Faasaoga a le Komiti i le Fuaiupu 1 ma le Igoa o le Tulafono.

Tulai mai lau Afioga i le Taitaifono o le Komiti.

**Afioga ALIIMALEMANU ALOFA TUUAU:** Lau afioga i le Fofoga Fetalai, ou te faatu le Faasaoga e faapea:

**“FAASAOGA:**

**Lomiga Samoa:**

*Ia aveesea le fuainumera “2017” ma ia suia i le fuainumera “2018” ma faitauina ai le Igoa o le Tulafono e faapea:*

**Teuteuga o le Tulafono o Galuega Tinei Mu ma Faalavelave Tutupu Faafuasei 2018”.**

20 MATI 2018

**Tulafono Tau Faaofi o Teuteuga o le Tulafono o Galuega Tinei Mu ma  
Faalavelave Tutupu Faafuasei 2017 – iloiloga auiliili**

**English Version:**

*Delete the number “2017” and substitute thereby the number  
“2018” thus reads:*

**Fire and Emergency services Amendment Act 2018”.**

*Faamaonia le Faasaoga.*

*Faamaonia le Fuaiupu 1 ma le Igoa e pei ona Faasaoina.*

*Na faagasolo le Tulafono Tau Faaofi o Teuteuga o le Tulafono o Galuega  
Tinei Mu ma Faalavelave Tutupu Faafuasei 2018 faatasi ma le Teuteuga ma  
le Faasaoga.*

**TULAFONO TAU FAAOFI O TEUTEUGA O LE TULAFONO O  
TULAGA MAMALU MA FAAILOGA TAUALOA 2017  
– iloiloga auiliili**

**FOFOGA FETALAI:** E tusa ai ma Tulafono Tumau e 107, e tatau ona faamaonia muamua e le Fono Aoa o le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi.

E tapa ma le faaalalo lau Afioga i le Taitaifono o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae.

**Afioga Hon AEAU PENIAMINA LEAVASEETA (Taitaifono Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae):** Lau Afioga i le Fofoga Fetalai, ou te tulai atu e faatu le lafo, *Ina ia faamaonia e le Fono Aoa o le Lipoti a le Komiti o lo o fautuaina ai, ina ia faagasolo le Tulafono Tau Faaofi o Teuteuga o le Tulafono o Tulaga Mamalu ma Faailoga Taualoa 2017 faatasi ma le Teuteuga ma le Faasaoga.*

*Faaluaina e le sui usufono mo Palauli le Falefa ma le sui usufono mo Safata Sasae.*

*Na faamaonia le lafo.*

**FOFOGA FETALAI:** E tusa ai ma le Tulafono Tumau 102, e amata le Iloiloga Auiliili i le Fuaiupu 2.

**FUAIUPU 2: Ua teuteuina le fuaiupu 2.**

*Faamaonia.*

20 MATI 2018

**Tulafono Tau Faaofi o Teuteuga o le Tulafono o Tulaga Mamalu ma  
Faailoga Tauloa 2017 – iloiloga auiliili**

**FUAIUPU 3: Ua teuteuina le fuaiupu 6 ma le 8.**

**FOFOGA FETALAI:** O lo o i ai le Teuteuga a le Komiti i le Fuaiupu 3.  
Tulai mai lau Afioga i le Taitaifono.

**Afioga Hon AEAU PENIAMINA LEAVASEETA:** Lau Afioga i le  
Fofoga Fetalai, ou te faatu le Teuteuga i le Fuaiupu e 3 e faapea:

**“TEUTEUGA:**

**Mo le Lomiga Samoa:**

*Ia faaofi le “faafuaiupu (3)” fou ina ua tuanai le “faafuaiupu (2)”  
e faapea:*

**“(3) Faasinomaga i:**

- (a)“Tulaga Faapitoa” i le fuaiupu 6 ma le 7; ma
- (b)“Tulaga muamua” i le fuaiupu 9; ma
- (c)“Tulaga Lua” i le fuaiupu 10; ma
- (d)“Tulaga Tolu” i le fuaiupu 12; ma
- (e)“Tulaga Fa” i le fuaiupu 13,  
ua soloia i so o se vaega e aliae ai.”

**English Vesion:**

*Insert “new subclause (3)” after “subclause (2)” as follows:*

**“(3) References to:**

- (a)“Special Class” in section 6 and 7; and
- (b)“First Class” in section 9; and
- (c)“Second Class” in section 12; and
- (d)“Third Class” in section 3,
- (e)“Fourth Class” in section 13,  
are omitted where ever they appear.”

*Faamaonia le Teuteuga.*

*Faamaonia le Fuaiupu 3 e pei ona Teuteuina.*

20 MATI 2018

**Tulafono Tau Faaofi o Teuteuga o le Tulafono o Tulaga Mamalu ma  
Faailoga Taualoa 2017 – iloiloga auiliili**

**FUAIUPU 4:** Ua suia le fuaiupu 20.

*Faamaonia.*

**FUAIUPU 5:** Ua teuteuina le fuaiupu 23.

*Faamaonia.*

**FUAIUPU 1 MA LE IGOA:**

**FUAIUPU 1:** Igoa puupuu ma le amataga.

**IGOA:** Teuteuga o le Tulafono o Tulaga Mamalu ma Faailoga  
Taualoa 2017.

**FOFOGA FETALAI:** O lo o i ai le Teuteuga a le Komiti i le Fuaiupu 1  
ma le Igoa o le Tulafono.

Tulai mai lau Afioga i le Taitaifono.

**Afioga Hon AEAU PENIAMINA LEAVAISEETA:** Lau Afioga i le  
Fofoga Fetalai, ou te faatu le Faasaoga i le Igoa o le Tulafono e faapea:-

**“FAASAOGA:**

**I le lomiga Samoa:**

*Ia aveese le fuainumera “2017” ma suia i le fuainumera “2018” ma  
faitauina ai le Igoa o le Tulafono e faapea:*

**“Teuteuga o le Tulafono o Tulaga Mamalu ma Faailoga  
Taualoa 2018.”**

**English Version**

*Omit the numeral “2017” and substitute thereby the numeral  
“2018” thus reads:*

**“Honours and Awards Amendment Act 2018.”**

*Faamaonia le Faasaoga.*

*Faamaonia le Fuaiupu 1 ma le Igoa e pei ona Faasaoina.*

*Na faagasolo le Tulafono Tau Faaofi o Teuteuga o le Tulafono o Tulaga  
Mamalu ma Faailoga Taualoa 2018 faatasi ma le Teuteuga ma le Faasaoga.*

20 MATI 2018

**TULAFONO TAU FAAOFI O TEUTEUGA O LE TULAFONO O LE  
FAAFOEGA O KASINO MA TAALOGA ESEESE TAU TUPE (NU.2)  
2017 – iloiloga auiliili**

**FOFOGA FETALAI:** E tusa ai ma Tulafono Tumau 107, e tatau ona faamaonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi.

Tulai mai lau Afioga i le Taitaifono o le Komiti o Tupe Maua ma Tupe Totogi.

**Afioga ALIIMALEMANU ALOFA TUUAU (Taitaifono o le Komiti o Tupe Maua ma Tupe Totogi):** Lau Afioga i le Fofoga Fetalai, ou te tulai atu e faatu le lafo, *Ina ia faamaonia e le Fono Aoa le Lipoti a le Komiti o lo o fautuaina ai, ina ia faagasolo le Tulafono Tau Faaofi o Teuteuga o le Tulafono o le Faafoega o Kasino ma Taaloga Eseese Tau Tupe (Nu.2) faatasi ma le Teuteuga ma le Faasaoga.*

*Faaluaina e le sui usufono mo Salega Sisifo ma le sui usufono mo Palauli le Falefa.*

*Na faamaonia le lafo.*

**FOFOGA FETALAI:** Ou te faasilasila atu ua faamaonia nei e le Fono Aoa le Lipoti a le Komiti i le Tulafono Tau Faaofi.

E tusa ai ma le Tulafono Tumau, e amata le Iloiloga Auiliili o le Tulafono Tau Faaofi i le Fuaiupu 2.

**FUAIUPU 2: Ua teuteuina le fuaiupu 2.**

*Faamaonia.*

**FUAIUPU 3: Ua teuteuina le fuaiupu 5.**

*Faamaonia.*

**FUAIUPU 4: Ua teuteuina le fuaiupu 6.**

*Faamaonia.*

**FUAIUPU 5: Ua faaofiina le fuaiupu 8A fou.**

*Faamaonia.*

20 MATI 2018

**Tulafono Tau Faaofi o Teuteuga o le Tulafono o le Faafoega o Kasino ma  
Taaloga Ecese Tau Tupe (Nu.2) 2017 – iloiloga auiliili**

**FUAIUPU 6: Ua teuteuina le fuaiupu 9.**

*Faamaonia.*

**FUAIUPU 7: Ua teuteuina le fuaiupu 19.**

*Faamaonia.*

**FUAIUPU 8: Ua teuteuina le fuaiupu 22.**

*Faamaonia.*

**FUAIUPU 9: Ua teuteuina le fuaiupu 24.**

*Faamaonia.*

**FUAIUPU 10: Ua teuteuina le fuaiupu 37.**

*Faamaonia.*

**FUAIUPU 11: Ua teuteuina le fuaiupu 49.**

*Faamaonia.*

**FUAIUPU 12: Ua teuteuina le fuaiupu 51.**

*Faamaonia.*

**FUAIUPU 13: Ua suia fuaiupu 52 ma le 53.**

*Faamaonia.*

20 MATI 2018

**Tulafono Tau Faaofi o Teuteuga o le Tulafono o le Faafoega o Kasino ma  
Taaloga Ecese Tau Tupe (Nu.2) 2017 – iloiloga auiliili**

**FUAIUPU 14: Ua teuteuina le fuaiupu 57.**

*Faamaonia.*

**FUAIUPU 15: Ua teuteuina le fuaiupu 61.**

*Faamaonia.*

**FUAIUPU 16: Ua teuteuina le fuaiupu 66.**

*Faamaonia.*

**FUAIUPU 17: Ua teuteuina le fuaiupu 84.**

*Faamaonia.*

**FUAIUPU 18: Ua teuteuina le fuaiupu 88A.**

*Faamaonia.*

**FUAIUPU 19: Ua faaofiina Fuaiupu Fou 88B ma le 88C.**

*Faamaonia.*

**FUAIUPU 20: Ua teuteuina le fuaiupu 89.**

*Faamaonia.*

**FUAIUPU 21: Ua faaofiina Fuaiupu Fou 89A ma le 89B.**



20 MATI 2018

**Tulafono Tau Faaofi o Teuteuga o le Tulafono o le Faafoga o Kasino ma Taaloga Esecese Tau Tupe (Nu.2) 2017 – iloiloga auiliili**

**FOFOGA FETALAI:** O lo o i ai le Teuteuga a le Komiti i le Fuaiupu 21. Tulai mai lau Afioga i le Taitaifono o le Komiti.

**Afioga ALIIMALEMANU ALOFA TUUAU:** Lau Afioga i le Fofoga Fetalai, ou te faatu le Teuteuga i le Fuaiupu 21 e faapea:-

**“TEUTEUGA:**

**I le Lomiga Samoa:**

*Mo le Fuaiupu 89A ua fautuaina, ia suia e faapea:-*

**“Fuaiupu 89A. Pepa Faatumu ma Totogi Fuapauina –**

**(1) E mafai e le Ofisa Sili o Pulega ona faamaonia pepa faatumu mo so o se faamoemoe i lalo o lenei Tulafono, po o so o se Tulafono lea o lo o i ai le matafaioi a le Pulega.**

**(2) E mafai ona faia Tulafono Faatonutonu e faatonuina ai o totogifuapauina m tau faace atu mo le faamoemoe o lenei Tulafono, ma le aofaiga o so o se totogi fuapauina po o se tau faace atu ua faatonuina i lalo o lenei fuaiupu:**

- (a) o le a tatau ona fautuaina e le Pulega; ma**
- (b) i le noatia ma le fai fuafua i le iloiloga ma le faamaoniga a le Komiti Faatino o Tupe Maua a le Atunuu i lalo o le Tulafono o le Pulega o Tupe a le Malo 2001.”**

**English Version:**

*For proposed new section 89A, substitute with the following:-*

**“89A. Forms and fees –**

**(1) The Chief Executive Officer may approve forms for any purpose under this Act, or any Act for which the Authority has responsibility.**

**(2) Regulations may be made to prescribe fees and charges for the purpose of this Act, and the amount of any fee or charge prescribed under this section:**

- (a) shall be proposed by the Authority; and**
- (b) is subject to the consideration and approval of the National Revenue Board under the Public Finance Management Act 2001.”**

*Faamaonia le Teuteuga.*

20 MATI 2018

**Tulafono Tau Faaofi o Teuteuga o le Tulafono o le Faafoega o Kasino ma Taaloga Eseese Tau Tupe (Nu.2) 2017 – iloiloga auiliili**

*Faamaonia le Fuaiupu 21 e pei ona Teuteuina.*

**FUAIUPU 22:** Ua teuteuina le fuaiupu 92.

*Faamaonia.*

**FUAIUPU 23:** Teuteuga faatupulaia i le Tulafono o Lafoga o Tupe Maua 2012.

*Faamaonia.*

**FUAIUPU 1 MA LE IGOA:**

**FUAIUPU 1:** Igoa Puupuu ma le Amataga.

**IGOA:** Teuteuga o le Tulafono o le Faafoega o Kasino ma Taaloga Eseese Tau Tupe (Nu.2) 2017.

**FOFOGA FETALAI:** O lo o i ai le Faasaoga a le Komiti i le Fuaiupu 1 ma le Igoa o le Tulafono. Tulai mai lau Afioga i le Taitaifono o le Komiti.

**Afioga ALIIMALEMANU ALOFA TUUAU:** Lau Afioga i le Fofoga Fetalai, ou te faatu le Faasaoga i le Igoa o le Tulafono e faapea:-

**“FAASAOGA:**

**I le Lomiga Samoa:**

*Ia aveese le fuainumera “(2) 2017” ma suia i le fuainumera “2018” ma faitauina ai le Igoa o le Tulafono e faapea:-*

**“Teuteuga o le Tulafono o le Faafoega o Kasino ma Taaloga Eseese Tau Tupe 2018”.**

**English Version:**

*Omit the numerals “(2) 2017” and substitute thereby the numeral “2018” thus read:-*

**“Casino and Gambling Control Amendment Act 2018”.**

20 MATI 2018

**Tulafono Tau Faaofi o Teuteuga o le Tulafono o le Faafoga o Kasino ma Taaloga Eseese Tau Tupe (Nu.2) 2017 – iloiloga auiliili**

*Faamaonia le Faasaoga.*

*Faamaonia le Fuaiupu 1 ma le Igoa e pei ona Faasaoina.*

*Na faagasolo le Tulafono Tau Faaofi o Teuteuga o le Tulafono o le Faafoga o Kasino ma Taaloga Eseese Tau Tupe 2018 faatasi ma le Teuteuga ma le Faasaoga.*

**TULAFONO TAU FAAOFI O TEUTEUGA O LE TULAFONO O LE FAALILIUINA O FANUA FAALE-AGANUU 2017 – faitauga faalua – felafolafoga faaauau mai le aso 29 Ianuari 2018**

**FOFOGA FETALAI:** E tolopo Taulumaga i le Aso Fono 29 Ianuari 2018 o lo o tulai mai le sui usufono mo Faasaleleaga Nu.2 e fia saunoa i le Tulafono Tau Faaofi lenei. Ma o le avanoa lenei mo le saunoaga a le sui usufono mamalu, ou te tapa foi lau Afioga e faaauau lou avanoa.

**Afioga PAU SEFO TAUMATA PAU (Faasaleleaga Nu.2):** Faafetai i lau Afioga i le Fofoga Fetalai mo lenei laolao ua tuuina mai i sui usufono e tusa ai foi ma le talosaga atu mo se avanoa e fia avatu ai foi se sao o lenei itumalo e tusa ai ma le Tulafono Tau Faaofi i le lisiina o fanua faale-aganuu.

O lenei Tulafono Tau Faaofi ua aumai o se Tulafono e fagufagu mai ai le soifua atiae o le atunuu e le gata i e o lo o solosolo lelei le tamaoaiga ma e foi e le o i ai se malosi o le tamaoaiga. O le vaega lea o nisi o afioaga po o aiga o lo o umia ni fanua se tele ae faigata ona saili pe faapefea ona atinae. A o lenei Tulafono Tau Faaofi ua aumai manino ina ia atiae uma lava tagata soifua aemaise e o lo o umia fanua i tua faapena foi le talafatai o Apia. E le gata i lea o lo o aumaia ai foi ma e o lo o lelei le latou tamaoaiga e sailiili aua e le o i ai ni o latou fanua e galulue ai. O le fesoasoani tele foi lea i e o lo o i ai a latou pisinisi e atiae ai ma faateleina ai pea lo latou tamaoaiga, o le agai lea e saili ni fanua i tua e faatino ai a latou atinae ma o le avanoa foi lea e maua ai galuega a aiga i a latou fanau, ae le gata foi i lea o isi afioaga o lo o saili ni galuega. E faaitiitia ai foi le tulaga foi lea o le tau saili ma le tele o fanau e le o o i ni aoga ona o le le lava o se seleni e faatino ai a latou aoga.

E faapena foi ona faaitiitia ai foi tupulaga ua leai ni galuega ona maua loa lea o le mea o le talepe fale. O le isi vaega lea e agai i ai lenei Tulafono Tau Faaofi. Atonu foi o le vaega lea o le soli o le Tulafono o le a faatoatele ai foi le nofoaga fou lea o lo o taumafai i ai le Pulega o Falepuipui o le a faaitiitia ai foi lena vaega, aua foi o le manao e maua ai le solitulafono.

20 MATI 2018

**Tulafono Tau Faaofi o Teuteuga o le Tulafono o le Faaliliuina o Fanua Faale-Aganuu 2017 – felafolafoaiga faaauau i luga o le faitauga faalua**

Ae pau lava se vaega o le Tulafono e fia fesili atu ai e auala atu i lau Afioga agai atu i le Minisita, o se vaega foi lea o le mokesi lea pe i ai se auala e ono totogi o le saili lea o se seleni foi lea i fanua ona alu lea o se talosaga i se nogatupe mai nisi lava pei o faletupe ona faifai lea o le atinae a lea aiga ma lea aiga, faapea foi ma e o lo o lisiina mai, e o lo o feoai i le taulaga o lo o lava le seleni ona le totogi lea o le mokesi lea. Po o le a le mamao o le Tulafono e mafai ai ona maua mai se fesoasoani i le o lo o aumai ai le seleni lea ina ia taumafai ai ona ao mai le seleni pe a faapea e le mafai ona totogi.

Silasila lau Afioga i le tuanai atu o isi tausaga e tele, o lo o i ai fanua o lo o faapea i fanua faale-aganuu e te i lava i lea itumalo ua manu ae faapea ua uma ona faatau fanua ia e papalagi mai aso la. Ae ou te talitonu o aitalafu nei o lo o aumai kamupani nei ae te i lava ua umia saoloto. E pei o manumanuga na o lou nei sui usufono, pe ua silasila i ai le Tulafono i le tulaga lea, ae faapea o lea ua uma ona tapena, aua o lea e i ai le vaega lea 16 o le Tulafono e pei ona aumai, ae ou te le o iloa la po o le a le loloto tele o le alu i tua ina ne i te i ua i ai se liliuga faaletulafono ua aumai i le Tulafono e ao ona faaliliu faa-umia saoloto le fanua.

O nai vaega ia e tuuina atu e auala atu i lau Afioga agai i le Minisita pe o i ai se vaega ne i te i ua lisi lisi le mafai ona faaolatia le tupe mai se nogatupe po o se faletupe ona aapa lea agai ina noatia mai le fanua o se aiga agai i le laisene. Ma ua maua foi lenei avanoa, o fanua nei e i tua o lou itumalo, leaga lava lenei itumalo o lo o tele i ai fanua. Atonu foi o si vaega sia e molimoli atu ai le talosaga, ia ua leva lava ona talosaga lenei itumalo amata atu i le afioaga lea o Sapapalii, po o le a lava se faiga ua fia galulue lo matou itumalo, e lelei le faamatuu mai po o le a lava se faiga e ono mafai ai ona faamatuu mai e le Malo e auala atu i lau Afioga agai i le Minisita, leaga o lo matou itumalo o lo o i ai le faamanuiaga i fanua ia.

O le isi vaega, o eleele ia o aiga ia e lumafale i le sami, a faapea e alu atu se isi e manao e tanu gatai, e fuafua foi lea i ni pisinisi e ono fai ai e ese mai i le eleele lea i gauta. O le a se... pe mafai ona faamatuu mai e le aiga e ona le eleele lea e faafesagai agai i le tagata latou te lisiina ona tanu lea e le tagata o lo o taumafai i ai. Po o le a se faiga e ono mafai i ai aua o le tele lava o tagata ia e feoai nei e pei lava o le nofoaga lea e i gatai i le sami e pei e solomua i ai ona e faapea e lelei i ina e malu ma toe afea i se pisinisi.

O le isi vaega o lou tulai atu, o vaega ia e pei e pei o le mauga lea e i le isi pito a o le ogasami lea e fia tanu. Pe ono mafai ona faamatuu mai lena vaega e leai ni aiga ia po o se nuu foi e taipei foi o isi nuu ia e leai ni nuu e i ai ae na o le mauga lava. Pe mafai ona i ai se fua o le Tulafono pe faapefea ona ota manao e tanu gatai ia ona faatu ai lea o se isi pisinisi. Pe o le mea e agai i totonu o le Malo pe o se isi vaega ia. Ia o nai vaega ia e tuuina atu e lagolago ai le Tulafono a o lenei Tulafono e pei ona ou fai atu o se Tulafono e sili ona lelei o vaega na, atonu e le toe faatau afitusi ai se isi ma feoai le fanua ia ma maua ai vaega faasolitulafono ia ma faapena lea ona tupu ai ni faalavelave mo le lumanai.

20 MATI 2018

**Tulafono Tau Faaofi o Teuteuga o le Tulafono o le Faaliliuina o Fanua Faale-Aganuu 2017 – felafolafoaiga faaauau i luga o le faitauga faalua**

Ae ao lava ona tatou tapenapena i lenei Tulafono ae matua avatu le lagolago i le Afioga i le Minisita lea na ia aumaia le Tulafono. Ia manuia le Fono.

**FOFOGA FETALAI:** Malo, ia masalo ua uma ai i i sui usufono mamalu sa fia saunoa...

**Tofa Hon LAUOFO FONOTOE NUA FESILI PIERRE LAUOFO (Anoamaa Sisifo):** Lau Afioga i le Fofoga Fetalai, e puupuu lava se manatu...

**FOFOGA FETALAI:** Oi, ia lelei. Se i tuu atu le avanoa i le sui usufono mo Anoamaa Sisifo. Anoamaa Sisifo lau Afioga, faamalulu atu.

**Tofa Hon LAUOFO FONOTOE NUA FESILI PIERRE LAUOFO:** Faafetai i lau Afioga mo le avanoa. E lagolagoina e lou sui usufono le sini autu o lenei faamoemoe e pei ona saunoa le Afioga i le Minisita i lana saunoaga faamalalalama, o le taumafai lea e atinae le tele o tatou fanua faale-aganuu ia o lea ua tele ina taatitia ae le o faaaogaina, i se tulaga e aoga mo le aiga ia faapea foi le atunuu, e sailia ai se manuia ma atinae ai le tulaga tau le tamaoiga o le tagata ma lona aiga faapea foi ona manuia ai ma le atunuu lautele.

Ae o lou tilotilo pea i lenei Tulafono Tau Faaofi, o le tulaga lea e i ai i lona Tulafono Autu na pasia i le 1965, o lo o manaia lava le tulaga o lo o faataoto mai ai, i le tagata foi lea o lo o manao e lisi, ia po o se kamupani pe a. Ia o ia lea e tau o le leasee e feagai la ma le Afioga i le Minisita, o le Minisita la lea o le Trustee o le beneficial owner po o ia lea e puipuia aia tatau a le tagata e ona le fanua, fanua faale-aganuu. Ia o se fuafuaga lelei mai le amataga ma ua leva le Tulafono ma ua tele foi mokesi po o le lisi o fanua faale-aganuu ua maea ona faatino ma resitalaina i le tele o tausaga ua tuanai. O lona uiga la, o le Tulafono Tau Faaofi leni i lau vaai, e pei o le toe faaleleia atili o le tulaga o le vaega lea ina ia le gata ina ia aiaia ma puipuia aiatatau o e ona fanua, ae faapea foi le faaaogaina o fanua, ma o se fuafuaga lelei i lou lea talitonuga.

A o le vaega o le Tulafono Tau Faaofi o lo o faapena ona ou vaai atu e pei e foliga mai e numi ai pea leni mataupu, ona o le mokesiina lea o fanua faale-aganuu, a o fanua faale-aganuu o lo o faamauiina i lalo o le isi Tulafono o le Tulafono lea e faamau ai pule o fanua faale-aganuu po o le Land Titles Registration Act. O lalo la o le Tulafono lena, o la foi e faamau ai ma faamau ai mokesi o fanua umia saoloto. O lea la pei ua resitala faatasi fanua faale-aganuu ma fanua umia saoloto i lalo o le Tulafono lena ia aiaia atu tulaga faalisi o mokesi i lalo o le Tulafono leni. Ia ae manatua foi, o le sailiga o le pule po o se faaiuga a le Faamasinoga, e manino ai le pule o le fanua faale-aganuu o lo o sailia e le Faamasinoga o Fanua ma Suafa.

20 MATI 2018

**Tulafono Tau Faaofi o Teuteuga o le Tulafono o le Faaliliuina o Fanua Faale-Aganuu 2017 – felafolafoaiga faaauau i luga o le faitauga faalua**

I lau la vaai i lenei Tulafono Tau Faaofi, atonu pei o le mafuaaga lea e pei e numi ai le mataupu lea, aua i lalo o le Tulafono lena o Land Title Registration Act, o lo o faaaoga le faiga foi lea mai fafo, lea e faaaoga i fanua umia saoloto o le Torrens System. I lou lava la talitonuga i lenei mataupu e pei e manaia i lou taofi le faavae o se Tulafono e tausia e le Matagaluega o Fanua ma Suafa e faamau ai la fanua faale-aganuu. A uma lava sailiga a le Faamasinoga o Fanua ma Suafa ua manino le e ona le fanua ia po o le pule foi aua o lea e faaaoga ia le upu lea o le pule o le Faamasinoga lea, ona tuu ifo lava lea resitala i ina i se Tulafono i le Matagaluega o Fanua ma Suafa, ae aua le aumaia fua i i i le Tulafono lea a le MNRE lea e i lalo o le mea lea o le Torrens System, e pei o le mafuaaga lea i lau vaai, e pei ua tau numi ai le mataupu. Ae o le faiga ia o le lisi o fanua faale-aganuu, e mafai lava ona aiaia i lalo o le Tulafono Tau Faaofi lenei. Ia e pei o le vaega lena e pei ou te vaavaai au i ai, atonu e mafua ai fua ona vevesi mafaufau o isi faapea i le mataupu lava lenei faapea o le a le puipuia ai tatou fanua faale-aganuu.

E pei o le vaega lena lau Afioga aua o isi ina ia mausali ma mautu ia le faiga e fai ai i le Matagaluega o Fanua ma Suafa ia tuueseese ia fanua umia saoloto i i i le Matagaluega lea o Fanua ma Siosiomaga.

Ia o isi vaega o lo o atumatagi i ai lou taofi i i le...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai...

**FOFOGA FETALAI:** Ia malie le sui usufono se i tulai mai le Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** I le finagalo lea e faaalua e le sui usufono i le tuueseese, ua uma foi ona faalauiloa faalauaitete e le Loia Sili a lo tatou Malo, ia e faapea foi le Afioga i le tamaitai Loia o lo o faauluulu i ai le tulaga o Komisi e suia suiga ma toe teuteu tatou Tulafono.

O lo o matua manino ai lava i faasalalauaga nei, e leai lava se mea o afaina ai le tulaga o fanua faale-aganuu i le mea lea o lo o taoto ai tulaga ia o le resitala o fanua faapapalagi ma fanua faale-aganuu. O fanua faale-aganuu ia, o le mafuaaga e ala ai ona taua le resitala pea i i, ona o le tulaga o le maua ai o faamaumauga o mea o tuaoi o fanua faale-aganuu lea e tulai mai ai le feeseeseaiga o i latou o lo o finau. Ia ma e fua lelei ai elele nei ma faaaoga pine faaneionapo ma see ese ai ma mea sa masani ona tatou o mai ai, o le faaaoga o tuaoi e fua mai le isi laau i le isi laau. Ia o le faalavelave lena o mea ia, e sau le afa tulei i lalo laau e sue atu ua leai ni laau, ia pe faaaoga mea o ala, e sue atu ua leai ni ala, ua lau uma mai e fai ai tatou pa e tali atu ai taligalu.

20 MATI 2018

**Tulafono Tau Faaofi o Teuteuga o le Tulafono o le Faaliliuina o Fanua Faale-Aganuu 2017 – felafolafoaiga faaauau i luga o le faitauga faalua**

Ia po o fua i vaitafe, ia e sue atu ua sui le mea e alu i ai le vaitafe. A o le faaaoga la o le resitala lea, e avatu ai faiga faaneionapo e matua tui pine ma fua lea e pei o fuataga ia e faia nei, o mea na e tumau ma tamau mo faaiuga o faamasinoga o fanua ia faale-aganuu.

A o le resitalaina o fanua ia tau papalagi, e leai lava se mea o aveesea ai le tulaga manino o Tulafono ia ma Tulafono o le faiga o Faavae, e sa, sa, sa ona faatau se fanua faale-aganuu. E leai lava la se mea o afaina ai le Tulafono e pei ona i ai nei, ae taoto mai pea le fautuaga, o lea ua faalogologo i ai, e toe vaavaai foi i ai Loia a le Malo. A o le Loia foi tatou Loia Sili, e 50 loia la e i ai, faiai la e i ai i totonu. A o manatu la ia o loia taitoatasi ia e tetee nei, e na o latou lava na taitoatasi, ae 50 Loia ia o lea e tuufaatasi ina ia aua ne i i ai se mea e faaletonu. O lona uiga o lea e malu le tulaga lea e i ai i le taimi nei. E na o e lava na o loia e le fia malamalama, ma e te fiu e faamalamalama e le malamalama, lau Afioga i le Fofoga Fetalai, o lea lava e lelei Tulafono ia lea o lo o i ai nei. Afai e le fia malamalama ai nisi, faitalia ai latou, ae o lea lava e malupuipua le Tulafono o le Tulafono o lo o i ai nei, i le puipuga o Fanua Faale-Aganuu.

O le faaopoopo atu lena ae tuu mai pea le fautuaga ua aumai ia se i vaai foi i ai loia tusi Tulafono a le Malo pe tataua ona faaopoopo nisi pepa e faaelelea ai pepa a le Malo e faatele tupe ai i galuega faale-Malo, ae o lea lava e manino ma lelei ia Tulafono o lo o i ai nei.

**FOFOGA FETALAI:** Ia masalo o lea e....

**Tofa Hon LAUOFO FONOTOE NUAFESILI PIERRE LAUOFO:** Lau Afioga i le Fofoga Fetalai, ia ona e pei o le faauilavea a le Afioga i le Palemia i lau lauga lea, ae o lea o le a faaiu atu. Malie lou finagalo ona o le taimi o le tatou Fono.

Ae faafetai, e saolele le saunoaga a le Palemia, ae o lea ou te talanoa au ia i le oral scheme o le Tulafono, e pei o se faiga foi lele atonu e manino ai, ia ae o le a taatia atu pea ia le fautuaga aua e leai foi se agaga e finau i lea mea, ia aua o tulaga foi i tuaoi ia, ia o la foi lava e mafai ona faatonu mai e le Faamasinoga o Fanua ma Suafa ia aiga e o e fua ia tuaoi e faaaoga ia surveyors ia e fua ai ina ia faataoto lelei. E leai foi la se mea o le a faigata ona resitala faapea, ia ae mo fautuaga e faataatia atu e silasila i ai ia le Malo pe aoga pe leai.

O le vaega mulimuli lau Afioga, leai ona o lea ou te maitau atu i le Tulafono Tau Faaofi e pei e foliga mai e le toe faaaogaina e pei e apply le Tulafono lea o fanua po o le Property Law Act agai i le Tulafono lena. Ae se i silasila ifo la faamolemole lau Afioga i le Minisita, ona o le Tulafono lea ua aumai i i e le apply i le Tulafono lea, o le Tulafono lena o lea e aiaia ai le faatinoga mortgage sale.

20 MATI 2018

**Tulafono Tau Faaofi o Teuteuga o le Tulafono o le Faaliliuina o Fanua Faale-Aganuu 2017 – felafolafoaiga faaauau i luga o le faitauga faalua**

Afai la o le a aveese, o lona uiga la o le tulaga e fautua atu ai, e tatau la ona i ai se tatou Tulafono foi lea po o ni Tulafono Faatonutonu e faataoto mai ai le process e faatino ai le vaega lea pe afai o lea o le a le faaogaina le Tulafono lea ua aumai i i, ina ia faafaigofie ai ona faatino le faamoemoe pe a oo ina default i mea o mokesi ia.

Lau Afioga i le Fofoga Fetalai, faafetai mo le avanoa.

**FOFOGA FETALAI:** Ia, se i tulai mai le sui usufono o Vaimauga Sasae, sosoo ai lea ma le sui usufono o Safata.

**Afioga SULAMANAIA FETAIAI TAUILILI TUIVASA (Vaimauga Sasae):** Lau Afioga i le Fofoga Fetalai, faafetai mo le avanoa. Ae le i fai foi se sao o lenei itumalo i le Tulafono Tau Faaofi ua opea nei i le Maota, e manaia foi lenei laolao e faatalofa atu ai i lona Itu o le Malu, afio o lau Afioga i le Taitai o le atunuu, lau Afioga i le Palemia, lau Afioga Lupesoliai Fatialofa Tuilaepa Sailele Malielega, ia aemaise foi lau Afioga i le Sao Faapito le Sui Palemia faapea foi le afifio o le Kapeneta ma Minisita Lagolago, aumai foi i lenei Itu o le Maota, lea e afifio atu Afioga i sui usufono o le Palemene na tofofi mai e lo tatou atunuu aua le taitaiga o si o tatou Malo.

E faatalofa atu foi i lau Afioga i le Fofoga Fetalai, malo le soifua laulelei i lau Afioga, ua matagofie le tatou fonotaga ona o lea e vaai atu lava e te afio mai lava ma foai atu e le Atua le malos, aemaise foi le Afioga i le Sui Fofoga Fetalai. A o se faatalofa atu foi i le tapuaiga a le Aufaigaluega paia a le Atua, o lo o nonomanu i le Atua e tulivae ma anapopogi ma tatalo aua se manuia o Samoa ma ona tagata.

E faatalofa atu foi i le augafaapae o le Maota, le Afioga i le Failautusi ma lenei Matagaluega o le Ofisa o le Fono o lo o tautuaina le Fonousu a le atunuu. E faapea foi ona faatalofa atu i lea itu i afioga i Ofisa Sili o Pulega ma Pule Sili o Matagaluega ma Faalapotopotoga a le Malo o lo o lima ma vae i ai si o tatou atunuu, ae a le tapuaiga a si ou itumalo pele o Vaimauga Sasae. Ia, tapuai maia ma le manuia o lo o manuia lo outou sui usufono ona o la outou tatalo ma la outou tapuaiga.

Faafetai i le Afioga i le Minisita, le Afioga i le Sao Faapito e ona lenei mataupu, e ona foi lenei Tulafono Tau Faaofi. So o se tagata Samoa lava, e tau loa mea nei o fanua e leai ma se isi e le fia faaalua i ai se finagalo. E mafua i se a? Leaga o le tatou faasinomaga lea, o le tatou matupalapala lea na aumai e le Atua tatou te tautua ma ola ai. So o se matai lava la, e i ai lava lona faasinomaga, e i ai lava ona fanua ma ona tapuafanua ma mea e agai i ai. O lenei la Tulafono Tau Faaofi ua tuuina mai i le Laulau a Fono, ia, e popoe lava le sui usufono mo Vaimauga Sasae. E mafua i se a? O lea ou te mafatia i le taimi lenei, ona o ou eleele ia na ave faamalosi i le vaitaimi o Siamani.



20 MATI 2018

**Tulafono Tau Faaofi o Teuteuga o le Tulafono o le Faaliliuina o Fanua  
Faale-Aganuu 2017 –felafolafoaiga faaauau i luga o le faitauga faalua**

Ou te le tuuaiina nai ou tuua ua lagomau mai tiasa. E amata mai lava i si ou nuu o Laulii, e i ai fanua na ave e Siamani o la e oi ai nei si o matou nuu, sau i Letogo, e faapena. A o fanua lava o matou. O lea la e oo mai lenei Tulafono Tau Faaofi, o lea ou te...

**FOFOGA FETALAI:** Malie le sui usufono mo Vaimauga Sasae, se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, o se mea e fia faasao. Sa faatau e le tagata e le i faataua e le Malo o Siamani. Na faatau e tagata faipisinisi i na taimi po o tagata sa maua tupe, o tagata Siamani, na faatau la e fai ai a latou atinae. Ia, e i ai la faatauga fanua sa fai na molia i le faamasinoga maualuga, e 1,500 le aofai o faamasinoga na fai e le Malo o Siamani, sa fai i le High Court o Siamani. E tele la faatauga fanua sa toe soloia i ina, ona e le mafai ona faamaonia i luma o le faamasinoga e fetau le faatauga fanua na fai. Fatoa maua ai lava i ina le matua gaoi o isi papalagi. Ae i ai la faatauga fanua sa matua faamaonia i luma o le faamasinoga, o fanua la na o lea na ave lava e latou fai ai a latou atinae. A na faapea la e le tupu le taua lea na tupu, e faapenei e leai lava nisi na faatautee ia latou aua o latou e ana fanua. Ae talu ai la ua tupu le taua i le 1914, ona tutuli ese ai loa lea, fao a latou fanua e le Malo o Niu Sila, lea la na ave ai e le Malo eleele nei, o eleele o la e na alu lava i luga o Tulafono o la e na sao le faatauga. Ave loa lea i le Malo o Niu Sila, o ese loa le Malo o Niu Sila, aumai loa i le Malo, o fanua na matua motu lava i lalo o le Tulafono. Ua ou manatu e faasao le mea lea ona e le i faapea na ave faamalosi e Siamani, na ave e tagata ua matua faamaonia i luma o le faamasinoga maualuga, ma e 1,500 le aofai o faamasinoga sa fai.

O lea la lau Afioga i le Fofoga Fetalai, ia mautinoa lelei, aua le soona taua fua na ave faamalosi e Siamani. O faatauga fanua na totoe, o faatauga fanua o la e lava na faamaonia o faatauga fanua na sao ona fai.

**FOFOGA FETALAI:** Ia, masalo na ona fautua atu o le Nofoa, leaga e toe saili i tua faamaumauga o saunoaga a sui usufono mamalu, ae aua foi ne i tatou naunauta, aua ne i naunau tele. O le fautuaga a le Nofoa, aua tatou te naunau tele i le iā, ae silasila i le isi itu o le tupe, aua le upega ma tulaga na, e malu a apefoe ae pesia ai fofoga foi o le Palemene i le tau faatonutonuina o finagalo, leaga o la e faafofoga mai le atunuu. Ia, a o lea tatou te taua le vailiu lea, a o le vailiu foi len a o la e tau faasaosao ai foi isi afioaga. Leaga a toe tuli atu loa le saunoaga lea e tapa faamaumauga ia e pei e faapena ona i ai le popolega o le Nofoa. Ae ui i lea, tulai mai le sui usufono e faaauau le saunoaga, see ese ma le faaupuga lea....

20 MATI 2018

**Tulafono Tau Faaofi o Teuteuga o le Tulafono o le Faaliliuina o Fanua Faale-Aganuu 2017 –felafolafoaiga faaauau i luga o le faitauga faalua**

**Afioga SULAMANAIA FETAIAI TAUILIILI TUIVASA:** Ia, lau Afioga i le Fofoga Fetalai e usitaia lava e lenei sui usufono pe a malele le Palemia. Na pau lava le tulaga e tau fesoasoani atu ai, sa tapena lou itumalo e ave le mataupu lenei i o i Peretania, ma sa ou tatalo i lou itumalo, aua, e le gata i le Ao Mamalu o le Malo, o lona faletua o le tatou nuu, a o le afioga foi i le Palemia o le teine o le tatou itumalo. O lea la ua faataatia ai faapea.

O le a ou oso ese i le tulaga tau fanua lau Afioga i le Fofoga Fetalai.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, e i ai fanua o Lepa na ave ae oo mai nei lava o la e pipii i faamaumauga a le Malo fanua na sa ave foi i lenei taimi. O le tau faapea mai lava o se isi, tatou o e vaai le mea lea, ou fai atu, aua le maumau fua le tou taimi, o fanua o le Malo.

O le tulaga la lenei e le avea i ai le tatou sootaga foi lele o le faiava atu o le isi i le teine o le aiga o le isi ma le nuu, e le avea la i ai mea ia leaga e taugata. A lea na gau ai le \$300,000 a Siumu? Sau foi le isi loia faavalea, o la e ia te au famaumauga a Siamani, oo loa ina ua tuliloa, ae folalima mai e leai ma se mea e tasi. O lea la ua ou faamamaavega atu, maumau tupe na e totogi ai tou pasese tou te o ai i Peretania, e leai lava se mea o i ai i Peretania. O lea e maua iinei le tonu, o le faigofie ia o le tonu e le alu ai se tupe, tapuai pea o fanua o le Malo.

**FOFOGA FETALAI:** Malo. Manuia le fautuaga aoga, aveifo na tupe e faaoga i se isi mea.

**Afioga SULAMANAIA FETAIAI TAUILIILI TUIVASA:** Se a malele loa tama o le atunuu e leai lava se isi e toe auese i ai pe toe faasagatau atu. O fanua faale-aganuu lea o le a tautala i ai le sui usufono o le Vaimauga. E matua teena lava le faaupuga lea o le mokesiina o fanua. Na pau lava lenei o le vaiiliu lea e popoe i ai le atunuu. Ua leva ona lisi o tatou fanua faale-aganuu e leai lava se mea o tupu ai, o la e i ai o tatou aiga ma o tatou itumalo. A o le upu lea o lea e popoe i ai o tatou tagata i lenei vaiiti, o le upu lea o le aumai o le fanua faale-aganuu e mokesi ai le tulaga o le loan i le Bank. A faapea o se investor na sau e mokesi ma lisi o tatou fanua, sau pea ia ma ana ia tupe, aua o lea e manino lelei le sui usufono mo Vaimauga Sasae i le Tulafono Tau Faaofi, seiloga e ioe atu le auaga e mokesiina. Ioe i le lisi, a le ioe foi i le mokesi, o le popolega lenei. O le ave fua i ai o le upu mokesi aua e mafai ona sau ai le isi tagata taufaavalea o tatou sao, e le vaai maualalo i sao, ae i ai le isi sao foi lea e ok loa ma avatu i ai le faatagaga e lisi ai le fanua, amata loa ona alu i le investor lea e advance mai le payment po o le totogi. O le popolega la lea e i lou sui usufono, e fautua atu ai foi i le Afioga i le Tamaitai Minisita, a faapea la ua alu i luga le arrears i le aitalafu lea e i le Bank, e malamalama lelei le sui usufono i le Tulafono o le tatou Faavae 102 lea e faamanino mai e le mafai ona mokesiina ma faatauina, ua lava lea.

A o le tulaga lea e popoe i ai...

20 MATI 2018

**Tulafono Tau Faaofi o Teuteuga o le Tulafono o le Faaliliuina o Fanua Faale-Aganuu 2017 –felafolafoaiga faaauau i luga o le faitauga faalua**

**FOFOGA FETALAI:** Ia se i tulai mai le sui usufono mo Faleata Sasae i lea itu o le Maota.

**Afioga Salausa John Ah Ching (Faleata Sasae):** Lau Afioga i le Fofoga Fetalai, e faanoinoi atu e tulai atu o se mea e fia faamalamalama ona o le faamalamalamaga a le Ofisa Sili o Pulega. O le Tulafono Tau Faaofi lenei ina ua avatu i le tatou semina, e le mafai ona mokesiina le fanua. E mokesi le lisi ae le mafai ona mokesiina le Fanua Faale-Aganuu lea e alu i lalo o le Tulafono Tau Faaofi lea. Ia o lota ita lea malamalama o lea e tau faasoa atu ona o le faamalamalamaga a le Ofisa Sili o Pulega ma le Ofisa. Faafetai mo le avanoa.

**Afioga SULAMANAIA FETAIAI TAUILILI TUIVASA:** Faafetai lava i le faauilavea a le Sui Minisita. O fea e tu ai le mokesi, e tu i le ea? O le fanua lea e i ai lea ua ave i ai le mokesi. O le land lea po o le fanua lea o le a ave i ai details o le fanua lea e... O le mea lea e leaga ai le tu mai fua o le isi i le mataupu a le isi.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, o lea e sao le alii fomai. O le mokesi la e i luga o le fanua ae ese lava le mokesi ese le fanua, e ui o la e tietie ai i luga o le fanua.

O le a ou avatua se faaitaiga. A faapea e 100 tausaga o le lisi, o le lisi lava lena e 100 tausaga. E matua tele le value. A alu alu lava toe 50 tausaga ae fao e le faletupe, o le malosi lena o le mokesi lea e totoe toe 50 tausaga. O le uiga lena, a uma loa le 50 tausaga ae toe fao foi ona ua faaletonu foi ae toe 25 tausaga, o le tagata e sau na te tauavea, na o le 25 lava tausaga o le malosi o le lisi lea. E tusa lava la pe tietie i luga o le fanua, e ese lava le fanua, ese le lisi. O le sao la lena, e na o le lisi lava ia, ae fua i le umi o tausaga. Ae a fao la toe tasi le tausaga, e toefe toe manao i ai se isi. Ia o le a le mea o le a mafai i luga o le tausaga e tasi?

Lau Afioga i le Fofoga Fetalai, o la e sao le faamalamalamaga, o le faamalamalamaga foi lena o lea e avatu e loia. Afai la e le malamalama le sui usufono, leitioa foi la le malamalama tagata i fafo atu ona e le o fia malamalama, a o le faamatalaga sao lena.

**FOFOGA FETALAI:** Se alofa ia le sui usufono mo Vaimauga Sasae, o oe lava le tagata muamua malamalama i le tatou semina.

**Afioga SULAMANAIA FETAIAI TAUILILI TUIVASA:** E malamalama lelei le sui usufono, a o popolega. O au a saunoa loa le Tama, aveese loa sou manatu. O le popolega la lea e avatu i lau Afioga i le Minisita ona o le a alu alu i luga aitalafu ia, o lea foi ua tatou vaai i ai i le Faavae, se i tulou lava, ua pei lava o le mea fua le suiga o le Faavae.

20 MATI 2018

**Tulafono Tau Faaofi o Teuteuga o le Tulafono o le Faaliliuina o Fanua Faale-Aganuu 2017 –felafolafoaiga faaauau i luga o le faitauga faalua**

E alu alu lava ua tele aitalafu i le Bank teuteu ai loa le Faavae faaletonu loa. E oo foi i tulaga i faamasinoga lea ou te fai atu ai i fanua faale-aganuu ia, e uma ifoga feutanaiga ia....

**FOFOGA FETALAI:** Se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, o upu ia i le suiga o le Faavae, e le soona suia le Faavae. Ae saili i ai i le teuteuga o le Faavae, o mea e aupito sili ona taua mo le atunuu lenei lena e teuteu ai le Faavae. Ae le faia le mea e teuteu le Faavae o mea ia o measina a le atunuu. Ma le isi mea ne i galo ia te oe, aua le faatusalia tatou ia Niu Sila ma Ausetalia e pei o mea ia e aumai e le au tetee. O tatou o matai, o matai o tatou aiga, o lona uiga o tatou o vale pe a faapea tatou te nonofo ma fai se mea e aveese atu ai o tatou fanua ma tatou. O le atunuu, aua le faatusatusa tatou ia Niu Sila ma Ausetalia, leaga e ese fanua faale-aganuu, ese tagata la e pulea fanua faale-aganuu i Niu Sila ma Ausetalia ese tagata la e tusia Tulafono, e le o ni Maori la e tusia Tulafono, e leai ni o latou fanua. E le o pulea foi e Maori, e le o pulea foi e Aborigines Ausetalia, a o tatou, o lea e tusia e tamalii Samoa Tulafono, o lea e pasia e matai uma Samoa, tatou uma, o tatou o lea e lea measina a o tatou aiga. Tatou te le fia faia ni Tulafono e mamulu atu ai a tatou measina.

Lau Afioga i le Fofoga Fetalai, e pei o le mea lena o lea e misi, e galo ia tatou, aua le aumaia Niu Sila ma Ausetalia o tagata la e i ai e leai ni o latou fanua faale-aganuu, a o tatou o Samoa lea e lotea a tatou mataupu, o tatou e pulea fanua.

**FOFOGA FETALAI:** Ia, atonu o lena ua malamalama le sui usufono mamalu.

**Afioga SULAMANAIA FETAIAI TAUILIILI TUIVASA:** Lau Afioga i le Fofoga Fetalai o le a faauma atu so matou manatu leaga o lea e faauilavea mai lava le Tama o le atunuu.

**FOFOGA FETALAI:** Ia, se i tuu atu lava... O le a se mea o finagalo i ai le sui usufono mo Alataua Sisifo?

**Afioga Aliimalemanu Alofa Tuuau:** Lau Afioga i le Fofoga Fetalai, na ona fia fesoasoani atu i le matou Itu Agai. O le mataupu ua laga i le popolega i le suiina o le Faavae, na ona fesoasoani atu lava i le matou itu e toe faamalamalama atili, o lo o i le Mataupu 109 na pau lava le mea e mafai ai ona sui le 102 lea e i ai eleele tau le aganuu pe a toe foi i tua le referendum i itumalo faaalaalafaga, ne i popolega ai le matou itu i lea tulaga.

20 MATI 2018

**Tulafono Tau Faaofi o Teuteuga o le Tulafono o le Faaliliuina o Fanua Faale-Aganuu 2017 –felafolafoaiga faaauau i luga o le faitauga faalua**

A o suiga ia o le Faavae i isi tulaga uma o le Faavae lea e fai i totonu i le 2/3, a o le tatou Fono. A o le mataupu i elele i fanua tau Samoa, e toe foi i tua. Ma le faaaloalo lava. Faafetai.

**Afioga SULAMANAIA FETAIAI TAUILIILI TUIVASA:** Lau Afioga i le Fofoga Fetalai o le a faauma atu. E i ai le upu foi lea, e toe oti lava tatou ia tatou. Sa ou manao e tali mai o, a o lea ua toe tali mai lava iinei, a o lea e tautala, o le Taitai o le Itu Agai lea e tautala a o lea ua toe tu mai. O le a faauma atu. E le gata la i le Bank lea e popoe i ai... O lea la ua saunoa le Afioga i le Tama o le atunuu e le mafai ona suia le Faavae, viia le Atua i le mea lena, o lou agaga foi lena, aua ne i toe suia le... A o faamasinoga la nei o le a tulai mai...

**FOFOGA FETALAI:** Malie le sui usufono se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, na ou faapea lava e faafofoga le sui usufono o le itu malosi i le faamalamalama a le tamaitai faipule o le itu silisili atu ona malosi. O le tulaga sao lena. O le ala foi lena o lea ou te fai atu ai, aua e te popole i mea ia. Aua o le taimi e avatu ai mea ia i tua, o le tulaga lena, e le mafai le mafai pe a oo i le taimi e faatino ai le vaega lena o le Faavae. E pau lava lea o le mea, e tataua ona tatou o loa i tua e fai le Pelepesite pe ioeina. Ia, e le mafai foi ona tatou oo i lena mea ona o i tatou o matai. E taua tele le mea lea ia i tatou lava.

O i ai se matai o i e manao e faamatuu ese fanua e fitoitonu ia te ia ma lona aiga? O le tali e leai. Lau Afioga i le Fofoga Fetalai, o le fesoasoani atu lena i le sui usufono.

**FOFOGA FETALAI:** Masalo ua maua mai eí .

**Afioga SULAMANAIA FETAIAI TAUILIILI TUIVASA:** Lau Afioga i le Fofoga Fetalai masalo ua galo manatu. Ae ui i lea, o lea ua faafofoga le atunuu i se popolega sa i ai le sui usufono mo Vaimauga i Sasae. E le gata i Tulafono i Bank, a o Bank foi ia o tagatanuu o lo tatou atunuu, a o mea o faamasinoga. O lea lava ua fai le feagaiga i le Ofisa o le MNRE ae uma ane ua o i tai i le Supreme Court. O fea tupe a tagata e totogi ai faamasinoga, o lea foi e popole le sui usufono, ona o loa ma lo latou faauigaina, a o lea ua malele le Palemia, e le mafai ona maluelue, ia faafetai. E faauma i i sa matou faamatalaga.

**FOFOGA FETALAI:** Faafetai. E tetele lava i Pesega ae faapena lava ona maua le malamalamaaga ma manino auofala i le faapupulaga a le Malo. E le o i ai foi Tuivalea i le finagalo o le Malo ma le Kapeneta, na mafua ai ona aumai nei Tulafono e saili ai le lelei aua le atinaeina o le atunuu.

20 MATI 2018

**Tulafono Tau Faaofi o Teuteuga o le Tulafono o le Faaliliuina o Fanua  
Faale-Aganuu 2017 –felafolafoaiga faaauau i luga o le faitauga faalua**

Tulai mai le sui usufono mo Safata Sisifo. Malie ona o lea sa ou taua le sui usufono mo Safata lau Afioga i le sui usufono mo Faleata Sisifo.

Tulai mai e saunoa o lea lava e maua si ou avanoa.

**Afioga LEAANA RONNIE POSINI (Safata Sisifo):** Lau Afioga i le Fofoga Fetalai, e fia faaali foi se manatu o lenei itumalo o Safata i Sisifo i le Tulafono Tau Faaofi. E muamua ona faafetai i le Afioga i le Minisita i le Tulafono Tau Faaofi. Ou te talitonu foi o lea ua tele se malamalamaaga i le Tulafono Tau Faaofi, ona ua tali mai ai foi le Palemia, o lea ua lautele ai se malamalama i le Tulafono Tau Faaofi.

Na pau lava lea o se tuualalo i lau Afioga i le Minisita, sei silasila ane lava lau Afioga i le Minisita aua o lau Afioga lea e fai ma sui o aiga ia e a ia fanua ia. Se i silasila ifo i le taimi lea e fai ai maliliega a aiga taitasi po o afioaga foi ma kamupani ia o le a lisiina o tatou fanua. E i ai taimi o lea e tau maitau, e i ai nai aiga latou te le gafatia le totogiina o ni loia e faia maliliega ia. Ae pei e aumai ia loia a kamupani, ona omai lea e fai maliliega ia. E i ai taimi e faapitotasi ai le vaai a loia a kamupani, i mea foi e penefiti ai kamupani ae faatuatuanai nai o tatou aiga e a ia fanua. Ou te talitonu la lau Afioga i le Minisita, se i silasila ifo i ai, pe fai sau lisi foi lea ina ia atoatoa lelei le taimi o lea e fai ai le sainiga o le maliliega lea. Aua ou te talitonu e tasi lea mea ua tau maitau ua i ai faafitauli e tulai mai. O lau foi lea maitau lau Afioga i le Fofoga Fetalai i le tulaga lea i e sainsi ai, ae ua uma ona sainsi le maliliega ae ua i ai lape o mea nei.

O lea e tatalo atu ai lau Afioga i le Minisita, aua e sainsi nei foi le maliliega, ua tau foliga mai ua finau ai i i loia, e ono ave foi le mataupu i le faamasinoga, e pei ona taua e nisi sui usufono. Aua e i ai foi nisi taimi e pei ona saunoa le Palemia, e i ai lava isi loia e le fia malamalama i le Tulafono. O la lava e finau latou, ou te masalo o la e finau aua o la e maua ai a latou tupe i kamupani ia. A o la e finau sese i totonu o mataupu faapenei. O le popolega lena lau Afioga.

O le isi mea i lau Afioga, silasila ifo lava i le tulaga, aua o lea ua ou tau maitau i le tulaga i le lisiina o fanua, e pei e sau le isi tagata e lisiina le fanua ona taumafai lea e toe lisi le fanua lea i isi foi e sue ai ana tupe i totonu, ae ua latou faia le mea lea, ua le toe lisiina ae pei ua latou fetagofi faamatuu, fai mai e faatau share o le kamupani ona ave lea i le tagata lea. Sei e silasila ifo i ai lau Afioga i le tulaga lea.

O le isi mea i le tulaga lea lau Afioga, e i ai lava le finauga na ou finau ai, o la e foi e fai mai latou, e i ai le aia a le tagata lea e lisiina le fanua e toe faafou ai le lisi. E pei o lau faitau i le Tulafono Tau Faaofi, e leai se mea faapena o i ai. A o le finau mai a loia lea e finau ai, o la foi e i ai la latou aia e faafou ai le lisi aemaise lava i mea ia o atinae lau Afioga i le Fofoga Fetalai, e pei o faletalimalo aua e le taugofie. Afai o le tolusefulu tausaga ma le isi tolusefulu tausaga ae fai atu e faamuta i ina, e faigata ona latou talia le tulaga lea.

20 MATI 2018

**Tulafono Tau Faaofi o Teuteuga o le Tulafono o le Faaliliuina o Fanua  
Faale-Aganuu 2017 –felafolafoaiga faaauau i luga o le faitauga faalua**

**Susuga Hon Tuilaepa Auelua Fatialofa Lupesoliai Lolofietele Neioti  
Aiono Galumalemana Dr. Sailele Malielegaoui:** Lau Afioga i le Fofoga  
Fetalaii

**FOFOGA FETALAI:** Se i saunua atu le Palemia.

**Susuga Hon Tuilaepa Auelua Fatialofa Lupesoliai Lolofietele Neioti  
Aiono Galumalemana Dr. Sailele Malielegaoui:** O le fesoasoani tele lava  
lea e aumai e le Matagaluega. O lo o ia i latou le tomai, aemaise ua leva ona  
feagai i latou ma mea faapenei. O le tulaga la e tu ai le Matagaluega, e le tu  
na o tatou tagata, ae tu foi ina ia vaai ia tau amiotonu aiaiga e fai i lisi nei. O  
lona uiga o le tasi lea mea e faigata ai tele i faletupe tulaga ia o faiga o mea  
nei ma talia ai a tatou fanua lisi ona o nisi o aiaiga, o lea ua tuu atu le malosi,  
a o nisi o aiaiga e manao i ai e e ana fanua, o le uma ane ua leai a ma se  
ioega. Ia manatua foi o tagata e omai e fai a latou lisi, e le o ni tagata foi o lo  
tafe ai le suasusu ma le meli. O lea foi e o mai ma nai a latou seleni e manao  
e teufaafaigaluega iinei i Samoa, ia maua foi si ana mea maua foi se mea a le  
tagata e ana le fanua. A faapea la e te finau pitotasi a oe na o oe, e uma ane ua  
le mafai ona lisi leai ma se tupe e maua.

E pei la o i e taua ai le faamalumalu a le Ofisa o le Minisita ma latou, e tau  
vaai ina ia paleni le finau. E i ai foi e e omai ia te au, o isi tagata o le matou  
nuu. E omai ia te au, o lau fautuaga, o i o i le MNRE e avane ai fautuaga  
lelei. Ae toe iu mai lava ia te au sei tilotilo lava i aiaiga ia, ona ou fesoasoani  
loa lea i ai, ona fai lea o lau fesoasoani ou te tu i le va. O la la ua i ai lisi  
faapena ua malosi lava le alu a le isi foi Hotel i totonu o le matou nuu o  
Aufaga. A na ou le pipii i ai i luga o le tulaga lea ia fair mo le tagata  
faipisinisi fair mo le aiga, meamanu e oo mai nei e leai lava se mea e faia. O  
le uiga lena o mea nei, ina nei tei ua tuituliaupu si au mataupu, ona o loa lea  
o tagata i fafo vaai ifo, na o paupau le mea e maua.

O le tulaga loa lena e fai lata finau ae ia taumafai foi e tu i o i se vae o le  
tagata le la. O le a le tulaga e i ai pe ana o au le la e i o? A o lea lava e maua  
le avanoa e soalaupule ai ma le aiga. E soalaupule lelei a ma le aiga i le tulaga  
o le avatu aumai.

E i ai le isi toaina o le matou nuu, na ou fai i ai e aua e te vavevave ae alu i  
o i le Ofisa e aveane ai le fautuaga lelei, a maea ona aumai lea se i ou toe  
tilotilo i ai. Ou te te i ua tulai mai i le isi aso aumai lana faitioga. Ona ou fai  
lea i ai, o fea o i ai le lisi na ou fai atu e aumai se i ou vaai i ai? Ae fai mai, e  
faamalie atu ua ou sainia ua ou vaai lava ma lau fanua ua manaia. Ou fai atu,  
e te toe faanoanoa ai i se taimi o mulimuli ane. Ae ou te iu ua tu, se ua atoa nei  
le ono masina e le o toe maua se lisi ae ua ou fiu e sue le tamaloa, ou alu atu i  
mea ia e i ai ua leai ni mea. Ou suea loa ae sue atu, faatoa lua vaiaso talu ona  
sola i Ausetalia, ae o la e taupe ai ma isi ana loan ua ou leiloa po o le  
Development Bank ea.

20 MATI 2018

**Tulafono Tau Faaofi o Teuteuga o le Tulafono o le Faaliliuina o Fanua  
Faale-Aganuu 2017 –felafolafoaiga faaauau i luga o le faitauga faalua**

O tulaga ia o lea ou te fai atu ai, e ese mamao lava mea ia e tusitusi i lalo ae ese foi le taimi e faatino ai. O le mea lena a tatou finau, finau ma lota mafaufau, i tei ua e manao tele ae uma ane ua le afa pau falaoa ae ua matua leai lava ma se mea.

Lau Afioga i le Fofoga Fetalai, e pei e faapena le faiga o pisinisi, e te finau fuafua ae le o le finau pitotasi.

**Afioga LEAANA RONNIE POSINI:** Lau Afioga i le Fofoga Fetalai o lea ua faamalamalama e le Palemia. E le toe tele foi la i ai so matou manatu. Ae pei o le uiga o la matou fautuaga, ona o la e i ai nai feeseeseaiga a loia, le loia a le Matagaluega ma le loia a le kamupani o lea e tau fetuutuunai ai. O lea foi latou te au mai i le mea lea matou te vaavaai i ai i le tulaga o feeseeseaiga i le tulaga o maliliega. O le tulaga foi lea lau Afioga, e oo foi i maliliega ia e sainia, e i ai maliliega e sainia i totonu, ae se i silasila totoa ifo lau Afioga i le Minisita aua e i ai le tatou lisi o le reserve list, lea e ave e faamauina i le vaega o le MCIL e le mafai ona toe aumaia tagata nei toe fai i totonu o lo tatou atunuu. E lelei foi le i ai o se tou fesootaiga ma le Matagaluega lea, aua o le maitau atu i la matou lisi lea e taua, e sau e le agavaa i totonu pisinisi ia na sainia i totonu o le maliliega lea.

Na o ni nai fautuaga e avatu i lau Afioga i le Fofoga Fetalai ma lau Afioga i le Minisita ae faafetai tele mo le avanoa.

**FOFOGA FETALAI:** Malo faafetai. Mo le fesili lava e tapena foi i ai le taimi a le Fofoga Fetalai mo faamaumauga. Se i tutulai mai lava pe i ai nisi sui usufono e fia saunoa i le Tulafono Tau Faaofi e fua i ai lo tatou avanoa. Tasi, lua, tolu, fa, lima, ono, o lea la ua maua, ono faaopoopo le tasi ua fitu. Malo faafetai, aua leaga o lea ua tatou toai taunuu i le tatou taimi manava e uma ai la tatou galuega.

O lea e pei e maitau foi lele ina ia faasolo la tatou lisi.

**Tofa Lealailepule Rimoni Aiafi:** E lua lava minute uma.

**TOLOPOINA**

**FOFOGA FETALAI:** Malie ia le sui usufono mo Faleata Sisifo e lelei lava le faafofoga mai o lou itumalo o e ta taeao, ioe, leaga e eseese lauga o le isi lauga eí E pei lava ona saunoa le Minisita mo Aoga, e sau lava le fuauli e toa le moa.

E i ai le manatu ua tatou toai taunuu i le siui o galuega o lenei foi aso. Ae tatou te le i tolopo ma tuu atu le avanoa i le sui usufono na te faaiuina i se tatalo.



20 MATI 2018

### **Tolopoina**

E momoli atu le faamalo ma le agaga faafetai i le paia o le Palemene, lau Afioga i le Palemia, Sui Palemia, o le Kapeneta, o Taitaifono faapea foi sui usufono mamalu o le Palemene, aemaise o Faauluuluga o Matagaluega ma Faalapotopotoga o lo o faapena ona latou tui mai le mulipapaga e tapuaia o faiva o le Palemene, ma auaunaga lautele e pei ona i ai le Ofisa o le Fono ma le mamalu o le Malo ma tulaga e pei ona i ai. Malo faafetai le agalelei ma le faamaumau i lenei aso.

Ae tatou te le i tolopo e tapa le sui usufono mo Falelatai ma Samatau na te faaiuina la tatou Fonotaga i se tatalo.

*Na tolopo Taulumaga a le Fono Aoao i le itula e 1:00 i le aoauli, seia aulia le itula e 9:00 i le taeao o le Aso Lulu, 21 Mati 2018.*